



續山東考古錄

卷十八之一  
之卷

ル 5  
3297  
5





門 凡 5  
號 3297  
卷 5

續山東考古錄卷之十八

兗州府上



滄州葉圭綬子佩甫述

滋陽縣

周魯負瑕邑乘邱邑

春秋哀公七年左傳以邾子益來囚諸負瑕杜注魯邑高平  
南平陽縣西北有瑕邱城按卽漢縣或曰舜就時於負夏者  
也寰宇記瑕邱在濮陽縣東南三十里衛公叔文子升瑕邱  
云云是在今直隸開州境也水經注將魯衛瑕邱混爲一  
又莊公十年公敗宋師於乘邱杜注魯地按卽漢縣

昭和十九年  
五月三十日  
購求



通典瑕邱東北有檀鄉姓譜齊公族有食邑於瑕邱檀鄉路  
史以爲古灌檀國按檀之名不見於春秋近魯似非齊邑後  
漢檀鄉賊據此

漢兗州山陽郡瑕邱縣泰山郡乘邱縣東平國樊縣

瑕邱縣故城在東北五里舊說在縣西二十里非也水經注  
洙水支津逕瑕邱城北又西逕寧陽故城南是瑕邱城在漢  
寧陽城東南也若在西二十里寧陽故城在縣直北則在寧  
陽西南矣縣東北古城舊以爲隋兗州城水經注稱漢縣卽  
魯負瑕邑舊唐志瑕邱下云宋置兗州於魯瑕邑故治隋因  
置瑕邱縣是隋縣卽漢治歷有明據惟元和志稱淮南王神

通營在瑕邱故城中似古城與隋唐治爲兩城或如高密夷  
安城輔唐昌安城諸城東武城之類新城在古城內耳觀後  
漢書章懷注瑕邱今兗州縣不云有故城可證漢志瑕邱應  
劭注瑕邱在西南是在西二十里者乃瑕邱非瑕邱縣或淮  
南營在彼唐初已誤爲古城歟俟再考

乘邱縣故城在西南三十里水經注洙水

自寧陽西

又西南合洙

水支津又西南逕太山郡乘邱縣故城東據此乘邱城當在

今漕河

卽洙支津故渠

合洙處之西南史記正義乘邱在瑕邱西三

十五里是也漢志作乘邱師古曰春秋公敗宋師於乘邱卽  
此應劭以乘氏爲乘邱最繆

詳鉅野



樊縣故城在西南二十五里俗名顧王城漢范縣古顧國或訛樊為范因有顧

王之稱歟俗傳盜跖所居盜跖無緣稱顧王也括地志樊縣故城在瑕邱縣西南三

十里顧王城東北去瑕邱故城里數吻合紀要近志皆稱在

濟寧州誤以瑕邱為瑕邱縣耳寰宇記引郡國志樊為卿

士樊仲皮國考春秋莊公二十九年樊皮畔王自是周畿內

地後以賜晉文者此非

後漢兖州山陽郡瑕邱縣任城國樊縣魏因之

後漢志南平陽下劉昭注引杜預注瑕邱一條考晉無瑕邱

據杜說蓋省入南平陽也後漢瑕邱未省當引係瑕邱下

晉兖州任城國樊縣及高平國南平陽縣地

劉宋兖州治瑕邱故城元嘉三十年復置兖州於此先治鄒山二十年省

為平陽縣地又陽平郡後魏加東頓邱縣地後魏因之魏志頓邱有乘城

齊周皆為兖州治為鄒縣地齊省平陽入鄒也

隋兖州魯郡治瑕邱縣開皇三年復

唐河南道兖州魯郡泰寧軍節度治瑕邱縣貞觀十四年升都督府

乾符三年賜軍號五代梁唐晉漢因之周廣順二年降為防禦

州

舊唐志武德五年徐圓朗置兖州據寰宇記五年下脫討平

二字元和志兖州沿革并及南兖州而晉宋治鄒山治瑕

邱反略不書甚不合



宋京東東路襲慶府泰寧軍節度治瑕縣建隆元年復爲軍政  
和八年升兗州爲襲慶府大觀四年改瑕邱爲瑕縣

金山東西路兗州泰定軍節度治嶷陽縣金改瑕縣爲嶷陽大  
定十九年移泰寧軍於奉符又於此置泰定軍

元都省山東濟寧路兗州治嶷陽縣憲宗二年州屬東平路至  
元二年省寧陽入嶷陽五年州屬濟州十六年屬大德元年復  
置寧陽

元志金改兗州爲泰定軍元初復爲兗州按唐宋以來州郡  
每帶軍號金兗州號泰定軍非改州爲軍也

明山東布政司兗州府治嶷陽縣兗州初屬濟寧府洪武十八

年升府成化間改嶷陽爲滋陽附洪武初設兗州左衛後改任  
城衛

縣徙今治史無明文縣志云洪武十八年封魯王於兗州遂  
升爲府而擴其南城是明初已在今治或曰卽是年徙俟考

國朝因之又爲兗沂曹濟道治 裁衛

縣志 年修  
知縣仲宏道

曲阜縣

古大庭氏都炎帝自陳徙都於此少皞都又壽邱邑商奄國都  
周魯國都又防邑戰國入楚

春秋昭公十八年左傳梓慎登大庭氏之庫杜注在魯城內



古國名孔穎達以爲古天子國司馬貞謂卽炎帝又謂人皇以後有大庭氏不可考矣寰宇記稱在曲阜縣城內縣東一百五十步

又定公四年左傳成王因商奄之民命以伯禽而封於少皞之墟帝王世紀曰少昊自窮桑登帝位窮桑在魯北後徙曲阜按旣自窮桑徙曲阜未必近曲阜地也

帝王世紀曰黃帝生於壽邱在魯東門之北史記舜作什器於壽邱寰宇記稱在曲阜縣東北六里闕里文獻考以爲宋仙源縣城卽其地

服虔曰商奄魯地皇覽云奄國在魯城內寰宇記史記云從

郭出魯奄中張茂先云卽魯之奄里一曰奄中里紀要奄在縣東二里仍在古城內也

魯國城卽漢縣曲阜之名見禮記明堂位篇應劭曰曲阜在魯城內委曲長七八里或曰名起於上古

孔子曾祖防叔闕里志云爲魯防邑大夫按防山在縣東南二十里蓋魯近郊邑

後漢志魯縣有牛首亭劉昭注引左傳桓十四年宋伐鄭取牛首按魯境內似不能有鄭地此自漢世亭名司馬氏亦誤載也 春秋發微曲阜縣西北有小穀城闕里文獻考城東北漢下村有古冢俗呼霸王頭相傳葬項王首處按春秋城



小穀當爲魯邑非齊之穀前錄詳矣漢王以羽初封於魯又以魯爲楚守持羽頭示魯父老因葬之穀城當爲近魯之地若穀城乃齊地何取持頭遠行葬於彼乎漢葬羽首當在此小穀邑亦當在此

漢徐州魯國治魯縣本秦薛郡治惠帝改魯國

魯縣故城在東二里今古城村魏志魯郡秦置爲薛郡高后

改爲魯國然則薛郡卽治此矣漢書楚元王傳王戊時削薛郡按時在景帝二年仍有薛

郡似魯爲分置非改置或曰改薛爲魯而別置薛郡今姑據魏志書之再考漢書灌嬰傳擊楚將公杲於魯北破之轉南破薛郡長身虜騎將入攻博陽按魯北魯縣北也轉南則至魯縣亦薛郡治魯之證漢志魯國屬

豫州後漢志光武改屬豫州劉宋志魯郡本屬徐州光武改

屬任城按漢志豫州當作徐州劉宋志任城當作豫州

後漢豫州魯國魯縣爲東海國治後漢建武二十八年魯王興徙北海以魯國益東海國東

海王實都魯縣別無魯國王而有魯相今書魯國治魯縣則沒東海國治之實又不能逕去魯國之名故變例書之魏復故

晉兗州魯郡治魯縣劉宋後魏因之

紀要宋魯郡治鄒縣以劉宋志魯郡首鄒縣耳不足據

魏志魯縣有魯城據元和志寰宇記曲阜古蹟去城里數知

宋以前縣治乃魯城東半此所有卽西半故址猶今稱東半

爲古城也漢魯靈光殿在魯城內似漢國城乃春秋舊址後

魏時已改而小之矣晉志作魯郡通典云晉改國爲郡是



也魏志以爲皇興三年改郡未詳何時曾復置國

高齊兗州任城郡治魯縣周因之

隋兗州魯郡曲阜縣開皇三年廢任城郡四年改魯縣曰汶陽十六

年又改

元和志開皇三年罷郡仍移汶陽縣理此按隋志稱四年改縣曰汶陽改與移不同未詳孰是隋初汶陽在今泗水非漢治近志有謂魯縣移漢汶陽故城者誤甚

唐河南道兗州魯郡曲阜縣貞觀元年省入泗水八年復五代因之

舊唐志武德元年省曲阜按其時兗州尙據於徐圓朗唐安得而省之其州說下作貞觀元年與新唐志同武德字係筆

誤 括地志昌平鄒邑皆係泗水蓋其時省曲阜入之也

宋京東東路襲慶府仙源縣大中祥符五年改曲阜曰仙源熙寧五年省鄒縣入之元豐五年復置

仙源縣故城在東八里今舊縣大中祥符五年徙通志云卽奄國之墟與舊說不合而別無依據不可從 宋志仙源魏

曲阜魏當作隋沿寰宇記之誤

金山東西路兗州曲阜縣天會七年改仙源仍名曲阜

元都省山東濟寧路兗州曲阜縣至元二年省泗水入之三年復析置

明山東布政司兗州府曲阜縣



明曲阜縣即今治古魯城西南隅也嘉靖三年徙此據縣志通志正德

九年徙再考

國朝因之

縣志乾隆二十九年修知縣潘相

寧陽縣

周魯闡邑曲池邑成邑成戰國入齊又戰國齊剛邑

春秋哀公八年齊人取讎及闡杜注岡縣北有闡鄉漢志剛故闡應劭曰春秋云云今闡亭是據此是闡邑非即剛縣城矣水經注汶水過岡縣北地理志云云引應說截去今闡亭句便似剛闡為一城者杜預云云岡城東有一小亭今岡縣治俗人又謂之闡亭

京相璠曰岡縣西四十里有闡亭汶水又西逕春亭北考古

無春名惟平陸縣有堂陽亭然是東去岡城四十里推璠所

注則符所未詳也按璠說疑遠沈水逕岡西闡亭東即指岡

城東之小亭應杜似皆指此闡公羊作儼齊乘闡在荏平北誤

又桓公十三年公會杞侯莒子於曲池杜注汶陽縣北有曲

池亭

又桓公六年公會紀侯於成杜注魯地在泰山鉅平縣東南

襄公十六年齊侯伐我北鄙圍郕傳齊侯圍郕杜注郕孟氏

邑水經注淄水今統名小汶又逕郕北春秋郕人伐齊飲馬於斯

水也按成自是魯孟氏邑後漢成縣若郕國則在今濮州境



隱五年衛師入郕公羊作盛莊八年師及齊師圍郕郕降於齊公羊作成傳云成者何盛也盛則曷為謂之成諱滅同姓也故杜預謂衛所入即東平剛父縣西南之盛鄉後漢志成縣下云本國愚謂郕與衛接故後入於衛如在剛平衛安得有之至孟氏成邑尤與郕國無涉成盛字古通用後人凡國邑名多加邑故成國成邑皆或作郕謂諱滅同姓改盛為成恐聖人不為此掩耳盜鈴事但據水經注剛平西南確有盛鄉城路史以郕為文昭成為文昭所分盛為召公後則截然三國未詳所本金改中都曰汶陽郕國成邑及陽關柴城又附會於汶上境甚謬昭公四年注稱成本杞邑尤所未詳 史記齊宣公四十八年取魯之

郕

史記穰侯列傳伐齊取剛壽按即漢剛縣在齊襄王十四年

春秋襄公十七年齊侯伐我北鄙圍桃杜注卞縣東南有桃

虛按卞縣桃虛在魯東南何得謂之北鄙乎昭公七年季孫

將以成與杞謝息不可與之桃以成與杞以桃與孟此即北鄙之桃漢

桃山縣在縣東北與成相近當即魯北鄙桃邑備考

紀要遂國城謝過城棘亭鉅平城陽關城皆係寧陽使稍為

稽核何至於此

漢兗州泰山郡寧陽縣剛縣桃山縣徐州魯國汶陽縣

寧陽縣故城在南十七里今古城



剛縣故城在東北三十里今堽城壩

桃山縣故城在東北十八里今石碣社土城通典龔邱下漢

桃鄉縣故城在東北考水經注汶水逕桃鄉城北在春亭後

春亭在縣西北桃鄉非東北明甚杜氏誤也縣志土城在東

北十八里漢褒魯侯食邑考漢書表褒魯侯邑在南陽平當是

南平而地理志桃山下注莽曰褒魯縣志亦誤也參兩誤說

而會通之知此城卽桃山縣杜氏誤作桃鄉縣志誤以莽名

爲漢侯邑矣紀要以滕縣桃山爲漢縣非是

汶陽縣故城在東北五十四里今城上村與泰安接界後漢書王梁傳攻肥城

文陽文陽卽汶陽水經注汶水自鉅平又西南逕汶陽縣北元和志

稱在龔邱縣東北五十四里是也通典謂在泗水縣東南非

漢縣矣詳泗水

後漢兗州東平國寧陽縣濟北國成縣剛縣豫州魯國汶陽縣

魏剛縣未詳何屬成縣寧陽未詳省否

成縣故城在東北九十里寰宇記校勘疑前漢志式縣卽成

之訛考王子侯表亦作式赤眉過式縣掠故式侯萌之子恭

茂盆子三人自隨又更始復封恭爲式侯後漢書通鑑皆作

式非成縣之訛明矣縣在前漢介鉅平汶陽柴三縣之間未詳何屬

補三國志剛父屬東平又無成縣據晉例魏也晉無寧陽補

志有皆無明據考剛父之名惟杜預春秋釋地一見而晉志



作剛平魏志亦稱晉曰剛平是晉未改稱剛父也平父字作十作父雖斜正不同形甚相近父蓋平字訛耳縱晉果名剛父安知魏已改稱乎

晉兗州東平國剛平縣泰山郡鉅平縣地成縣晉鉅平地見前豫州魯郡

汶陽縣

劉宋兗州魯郡汶陽縣陽平郡元城縣地魏志元城有寧陽城樂平縣地

魏志樂平有青山祠元和志龔邱縣青山在縣西三十里後魏有青石山祠即此今一名魏山

後魏兗州東平郡剛縣東陽平郡元城縣地樂平縣地及魯郡

汶陽縣地縣治徙今泗水縣魏志汶陽有汶陽城知故城猶屬之

後魏剛縣故城即古闡亭魏志剛縣改治剛城按酈道元稱

剛城東闡亭為今岡縣治此剛城當是闡城之訛

高齊兗州郡平原縣天保七年移後魏東陽平郡之平原

縣於此周因之

齊兗州平原縣即今縣治元和志龔邱縣高齊文宣帝移置

平原縣於漢寧陽故城北十七里按此平原縣治在今汶上

境與實土無涉寰宇記稱後魏移誤

隋兗州魯郡龔邱縣開皇十六年改平原為龔邱

元和志隋以與德州平原縣同名以縣東南二十里有龔邱

城遂改平原為龔邱按是時治梁鄒之平原尚未改名不獨

與德州平原同名也



隋梁父縣詳泰安準其地望甚似故成縣城備考

唐河南道兗州魯郡龔邱縣五代因之

宋京東西路襲慶府龔縣大觀四年改龔邱為龔縣

金山東西路兗州寧陽縣大定二十九年改龔縣為寧陽

續通考龔邱宋改寧陽誤

元都省山東濟寧路兗州寧陽縣至元二年省入嶧陽大德元年復

明山東布政司兗州府寧陽縣

國朝因之

縣志乾隆八年修知縣李夢雷古蹟有遂國等城沿紀要之誤又有鑄

國城虵邱城菟裘城皆不在縣境 春城即古春城郡繆

古城在縣南十五里魯大夫采邑按上文已有寧陽城

此似別一城縣南並無此城蓋即寧陽城而俗傳誤者

鄒縣

周邾國又繹邑邾徙都之其故都入魯為鄒邑又漆邑閭邱邑

皆入魯又魯平陽邑昌衍邑即昌平也據史記孔子世家昌平是鄉名非邑然未詳是否古制姑

書邑備考戰國邾稱鄒

春秋隱公元年公及邾儀父盟於蔑杜注邾今魯國鄒縣也

又文公十三年左傳邾文公卜遷於繹杜注繹邾邑魯國鄒

縣句北有鄒山按鄒山即繹山在今縣南二十里文公時邾



始遷此隱元年猶在故都不得亦注今魯國鄒縣也而邾故都究在何所古無明文余謂魯鄒邑卽邾故都邾遷後始入於魯也襄十年左傳邾人紇挾之以出門者杜注邾邑魯縣東南莖城是也魏志鄒有叔梁紇城寰宇記古邾城在曲阜今本訛作東北四十里括地志故鄒城在泗水縣西南或訛六十里紀要謂寰宇記之古邾城卽莖城最當水經注故邾婁之國曹姓也叔梁紇之邑也其明證已但道元亦以鄒縣當之與樂史稱邾城爲邾人築以備魯者則甚誤此城本屬曲阜宋鄒縣省入仙源後又析置遂入鄒縣其故址無存當在縣東北接曲阜境處 齊乘按六書邾鄒同聲之轉也春秋

時邾用夷謂之邾婁婁合閭音爲邾合婁音爲鄒余謂邾婁合讀卽爲鄒莖亦鄒字音轉邾國鄒邑皆可通稱邾鄒風騶皆通用之字也 寰宇記鄒縣故鄒城叔梁紇之邑漢爲縣不知卽曲阜之古邾城此沿水經注之誤又以爲漢南平陽縣尤繆 齊乘古邾城鄒縣南至邾文公乃遷於繹此城蓋其始封之邑又云鄒城嶧山南二里邾遷於繹考證云鄒城卽邾城于氏誤分爲二按于氏不知在縣南者卽繹考證謂與古邾城誤分爲二固是然此外實別有邾始封之城于氏及考證皆不知卽魯鄒邑耳通志以南平陽爲邾故國又沿寰宇記之誤宣公十年公孫歸父伐邾取繹正義以爲別有繹邑蓋近繹山而同名者若小邾之句繹亦其



類此釋公羊作  
類當別一邑矣

又襄公二十一年邾庶其以漆閭邱來奔杜注二邑在高平南平陽縣東北有漆鄉西北有顯閭亭水經注泗水南過平陽縣西南逕故城西謂之漆鄉杜預云云今見有故城在西南方二里所未詳也又洙水西南逕南平陽之顯閭亭西邾邑也杜預云云十三州記曰山陽南平陽縣又有閭邱鄉從征記曰杜謂顯閭邱也今按漆鄉在縣東北漆鄉東北十里有閭邱鄉顯閭非也以上皆從征記然則顯閭自是別亭未知孰是按漆鄉故城道元指在縣西南則在東北之說似誤閭邱今愈不能確指矣

又哀公二十七年左傳越子使后庸來聘盟於平陽杜注南

平陽今本訛西平陽漢志南平陽下孟康曰邾庶其以漆來奔今漆

城是水經注泗水逕南平陽之故城西謂之漆鄉似魯平陽

卽漆城漢始別置縣城者備考 竹書紀年惠成王二十九

年齊田盼及宋人伐我東鄙圍平陽卽春秋哀十六年衛侯

飲孔惺於平陽之地杜注云在燕縣東北寰宇記稱在韋縣

西二十里水經注與此平陽混爲一孟子一戰勝齊遂有南陽紀要謂卽平陽考公

羊傳齊桓使高子將南陽之甲立僖公而城魯是南陽自春秋已爲齊邑趙岐注岱山南謂之南陽當在魯北齊南境

春秋僖公二十九年左傳介葛盧來朝舍昌衍之上杜注魯

縣東南有昌平城括地志昌平城在泗水縣南六十里闕里



文獻考昌平山在尼山南五里下有魯源村即昌平鄉也按

昌平山在縣東北四十里昭二十二年大蒐于昌間疑即昌衍

邾戰國曰鄒音之轉耳寰宇記云魯繆公改考其時鄒魯時

相闕鬪敵國而非附庸魯安得而改之乎

漢徐州魯國騶縣及魯縣地兗州山陽郡南平陽縣及東平國

任城縣地後漢志任城有桃聚今陶城鋪

騶縣故城在縣東南二十五里俗曰紀王城紀亦邾音轉劉蒼鄒

山記邾城在山南三里

南平陽縣即今縣治舊以縣西三十里陶城鋪為漢南平陽

縣非也水經注泗水逕其縣西不逕其城西漆城在其西南

瑕邱城在其西北舊誤以瑕邱為瑕邱縣故不覺其誤若陶城漆城在東南瑕

邱城在東北其非南平陽城明矣後漢書章懷注南平陽城

今兗州鄒縣是也今治即唐治即漢南平陽城又明矣通典

鄒縣下云漢舊縣地亦曰南平陽縣寰宇記以鄒縣故城為南平陽城實由此致誤

蓋其時鄒縣即南平陽別無南平陽城故云然也陶城者漢

任城縣之桃聚城也後漢光武討龐萌宿任城東北去萌所

圍桃城六十里陶城西南去任城故城今濟寧州之仲家淺里數方向

吻合稱名未改以為南平陽城可乎章懷注在任城北近是其前注以為桃鄉縣誤

後漢豫州魯國騶縣又魯縣地兗州山陽郡南平陽縣永平二年益封

東平國未詳何時還屬又任城國任城縣地魏晉因之山陽晉曰高平東晉初充



州寄治鄒山

元和志晉建武初郗鑒為兗州刺史寄理鄒山上後為石勒所逼奔下邳 齊乘晉廢南平陽入鄒誤

劉宋兗州魯郡鄒縣及魯縣地高平郡平陽縣元嘉十三年兗州來治鄒山自滑臺徙此旋徙治彭城後魏因之

魏志平陽有平陽城則已非漢舊今陶城地名平陽社有平陽橋平陽店魏志任城下無桃城或平陽徙此歟俟再考

高齊兗州 郡鄒縣周因之

通志稱宋元嘉十三年鄒縣徙今治古無此說蓋誤以兗州治鄒山之年為鄒徙今治也據章懷注鄒縣即南平陽之說

知徙治在唐前魏志平陽故城屬平陽又知徙治在後魏後齊省平陽入鄒縣徙治當在此時備考

隋兗州魯郡鄒縣及曲阜縣地

唐河南道兗州魯郡鄒縣及曲阜縣地五代因之

宋京東西路襲慶府鄒縣熙寧五年省入仙源為鎮元豐七年復宋志省為鎮未詳是何鎮名復置後縣境與今同矣

金山東西路滕州鄒縣

元都省山東益都路滕州鄒縣

明山東布政司兗州府鄒縣

國朝因之



縣志康熙五十四年修沿革漢至後魏皆不載南平陽於

知縣婁一均

北齊云省鄒入平陽繆 金屬益都誤

泗水縣

周魯卞邑郟邑茂邑一名姑蔑又桃邑

春秋僖公十七年夫人姜氏會齊侯於卞杜注今魯國卞縣國語云魯有弁費弁卽卞也

又文公七年遂城郟杜注卞縣南有郟城按卽漢郟鄉縣

又隱公元年公及邾儀父盟於茂杜注卞縣南有姑城

又襄公十七年齊侯伐我北鄙圍桃杜注卞縣東南有桃墟

按此地非魯北鄙詳寧陽當是別一桃邑

元和志泗水縣卽春秋之虛朶也寰宇記杜注地闕學者舊

傳如此按虛朶之會爲楚伐宋謀救宋故地當近宋是會也

孟獻子請先歸會葬縣近在魯郊於情事尤不合今不取考

僖元年公敗邾師於偃虛邱之戎將歸者也杜云虛邱邾地

縣南有盧城或虛邱故城學者誤作虛朶今虛形訛爲盧歟

漢兗州魯國卞縣泰山郡東平陽縣地水經注邾水逕東平陽地而後至卞今發源至

入泗皆在縣境徐州東海郡郟鄉縣西境當有魯縣地

卞縣故城在東稍南五十里

郟鄉縣故城在

里水經注泗水逕卞縣南姑蔑

城北水出二邑之間西逕郟城北西南逕魯縣北是郟城在



卞縣西南也後漢志卞有郛鄉城漢縣卽古邑矣今無址或曰卽鄒縣東五十里之香城備考

後漢書光武紀章懷注泗水國今兗州縣通典泗水漢泗水國地考泗水國統凌泗陽于三縣在今江南境與縣毫無干涉

後漢豫州魯國卞縣魏因之後漢無東平陽魏復置縣境當仍有其地

晉豫州魯郡卞縣及兗州泰山郡新泰縣地東平陽改晉亂卞縣廢

晉書慕容蘭屯卞城卽卞城疑縣廢故稱城劉宋明帝泰始二年復

劉宋卞縣卽今縣治舊唐志泗水隋於古卞城置謂宋城也後魏兗州魯郡汶陽縣後魏移汶陽來治省卞縣齊周因之

後魏汶陽縣故城在北四里今故縣村魏志汶陽有汶陽城

知縣非漢汶陽矣通典稱漢汶陽城在泗水東南考漢汶陽

城在寧陽歷有明據近世耕者於故縣村北半里許得古碑

有汶陽縣字同年友王紹楨縣人也親見之證以通典知泗水本有汶陽城

既非漢城則為後魏縣無疑杜氏知縣境有古汶陽城而不

知為後魏縣城又似誤以漢之卞城當之故云在東南耳

隋兗州魯郡泗水縣開皇初省汶陽入魯縣又改魯縣為汶陽十六年又析

汶陽於劉宋卞城置是年汶陽改曲阜

寰宇記隋析汶陽置泗水縣舊說以為析漢汶陽不知置縣時汶陽卽今曲阜也



唐河南道兗州魯郡泗水縣貞觀元年省曲阜入之八年復析置五

代因之

宋京東西路襲慶府泗水縣

金山東西路兗州泗水縣

元都省山東濟寧路兗州泗水縣至元二年省入曲阜三年復

魏志汶陽有新甫山通考泗水有新甫山蓋其故境有今新泰西半並及泰安東南境徂徠山以南皆泗水地元析新泰置蒙

陰新甫山一帶入新泰當在此時徂徠山一帶疑於縣省入曲阜時析入奉符也

明山東布政司兗州府泗水縣

國朝因之

縣志明萬曆二十年修知縣尤應魯沿革表脫晉代

隋泗水注云益以汶陽地汶陽原係縣名自隋併入於泗

後不復見按縣劉宋迄隋沿革本難稽考然何至有隋併

汶陽入泗之謬耶 古蹟梁父城在北四里今故縣村按

梁父城在縣北八十里今在泰安境歷有明據詳泰安雖不

知為後魏汶陽城又何至以為梁父城耶康熙壬寅年又續







續山夏考古錄 卷之二十九

西逕仲虺城北應劭曰邳在薛楚元王子郢以呂后元年封

上邳侯也有下故此為上矣晉書地道記曰仲虺城在薛城

西三十里今縣西南五十里濼故渠南有驩城近志附會東

去薛城里數相符即仲虺城或以嶧縣南小灰驩虺音轉耳

左傳云商有邳姁是商時名邳不名薛此城又有仲虺之名

竹書紀年惠成王三十一年邳遷於薛杜預稱奚仲遷下邳

下邳遷於薛似皆誤紀要引晉志云奚仲遷於邳謂之或仲

上邳引此云邳遷於薛謂之下邳豈薛即下邳耶尤誤 虺居邳國自名薛故薛宰云然歟應劭正引此語或本作仲

虺居之傳寫者訛作仲虺居薛歟如後說是春秋之薛仍在

始遷居薛城矣證 紀年沈約注此條云改名徐州考春秋哀

十四年續經齊陳恒執其君寘於舒州史記齊太公世家作

徐州是春秋末已名舒州非始六國時也又紀年惠成王後

十年齊城薛即孟子所謂齊 十三年封田嬰於薛括地志薛

北周二十八里齊田文封 史記齊襄王立孟嘗君中立為諸

侯無所屬襄王與連和是田氏復封後儼與齊為敵國矣又

魯世家頃公十年楚伐我取徐州索隱曰徐音舒齊邑薛縣

是也是薛又入魯又入楚矣豈田氏已亡耶

滕國故城在西南十四里春秋隱公七年滕侯來朝杜注滕

國在沛國公邱縣東南 竹書紀年晉烈公二年於粵滅滕

按漢志云齊滅據孟子戰國策以為宋滅是也 路史滕國



黃帝第十一子所封 後漢志公邱本膠國滕字訛也

郟國故城在東 里春秋莊公五年左傳郟黎來來朝杜

注東海昌慮縣東北有郟城齊乘謂卽承縣小灰城縣志城

東六里有倪城府志作一里皆與杜注不合俟考

春秋昭公三十一年邾黑肱以濫來奔杜注東海昌慮縣後

漢志劉昭注以為縣所治城

狐台邑在東南二十里春秋襄公四年左傳臧紇救鄆侵邾

敗於狐台杜注蕃縣東南有目台亭按縣東南二十里有狐

台山

郎邑在西南五十二里春秋隱公元年左傳費伯帥師城郎

杜注高平方與縣東南有郁郎亭括地志郎亭在滕縣西南

五十二里按縣之西南卽方與東南今縣西境有郁郎村後

漢志高平下劉昭注隱九年費伯城郎考隱九年經書城郎

無費伯字又引杜預云云誤以高平字為縣名矣 又莊公

十年齊師宋師次于郎公子偃曰宋師不整可敗也自雩門

竊出大敗宋師于乘邱按在魯城內已望見宋師乘邱又近

魯城疑此郎或別是近魯地否則齊宋師自郎復進歟 漢

書王子侯表郁狼侯驕魯共王子史記作郁根卽此邑

縣南有孟嘗集或以為卽詩所謂居常與許者嶧縣西有地名南常縣

東四十里有靈邱城舊以為蜺鼃所辭縣西三十里有休城



舊以為孟子所居元和志謂合鄉即互鄉附存備考

秦泗水郡滕縣漢高祖破秦泗川郡守於薛縣然則薛為泗水郡治也薛郡則治魯

滕縣故城在西南十五里俗曰雍城元和志滕縣公邱故城

在縣西南十五里夏侯嬰初為滕令故號滕公按原此時高

祖未立屬縣故滕為秦縣按今縣西雍城近志以為無考即

此城也

漢徐州魯國蕃縣薛縣東海郡合鄉縣昌慮縣及南城縣地論衡

南城之冢曾子祖父葬處也今名曾子山在縣境又豫州沛郡公邱縣武帝改滕縣為

公邱據元和志又廣戚縣又兗州山陽郡湖陵縣莽曰湖陸及方與縣地

蕃縣故城在城西今治其東偏也漢志蕃下應劭注邾國也

晉志作小邾音皮師古曰白衰云陳蕃之子為魯相國人為諱改

曰皮此說非也郡縣之名土俗各有別稱不必皆因本字通

鑑胡注皮字乃反字傳寫之訛杜佑通典蕃音反按一說蕃

同番皮蒲何反與胡氏說皆可從

薛縣故城在南四十里通典云在縣東微東耳

合鄉縣故城在東二十三里今訛梁城一稱城頭元和志滕縣合

鄉故城在縣東二十三里寰宇記又稱在沛縣近志係嶧縣

皆非是困學紀聞王無咎曰鹿邑之外有互鄉城前代因立互鄉縣按互鄉似魯地合鄉外古未有互鄉名縣者

昌慮縣故城在東南五十九里

廣戚縣故城在南五十里舊以此城為東海戚縣非也通鑑



秦二世元年十一月沛公引兵之薛泗水守秦漢初郡官稱守景帝始改稱太壯兵敗於薛走至戚沛公左司馬得殺之胡注班志戚縣屬東海郡括地志沂州臨沂縣有戚縣故城余以地理考之沛郡之與東海相去頗遠壯兵敗而走未必能至東海之戚班志沛郡有廣戚縣章懷太子注曰廣戚故城在今徐州沛縣東恐是走廣戚之戚也按以戚為東海縣本漢紀小顏注臨沂去沛郡亦不甚遠壯所走容或是戚而此城為沛之廣戚則無可疑水經注泗水南逕小沛縣南又東南逕廣戚縣故城南一統志廣戚故城在江南沛縣東北四十里此城西南至沛縣吻合其數况戚縣在臨沂則此為廣戚更不待辨

也 曹參嘗為戚令故稱戚公或此縣秦本名戚歟

湖陵縣故城在西南七十五里縣舊係魚臺其故城兩縣各得其半沛縣亦有其地乾隆閒魚臺徙今治湖陵故地大約盡割隸滕沛魚臺新志因此凡湖陵山川人物槩不列入見其例言今故係此

後漢豫州魯國蕃縣薛縣沛國公邱縣徐州彭城國廣戚縣東

海郡昌慮縣合城縣合鄉兗州泰山郡南城縣地山陽郡湖陸

縣中興仍名湖陵章帝復改湖陸永平二年益封東平未詳何時復故又方與縣

地建安三年於昌慮置昌慮郡十一年郡廢魏因之

晉豫州魯郡蕃縣薛縣公邱縣徐州彭城國廣戚縣東海郡昌

慮縣合鄉縣兗州高平國山陽郡湖陸縣及方與縣地泰山郡南

武城縣地元康中蕃縣薛縣益彭城國見晉書彭城王傳及劉宋志十年合



鄉昌慮屬蘭陵郡東晉太元四年兗州治湖陸毛盛為刺史鎮此

劉宋徐州彭城郡蕃縣薛縣蘭陵郡合鄉縣昌慮縣及留縣地

宋省廣戚兗州魯郡陽平縣大明中置泰山郡南城縣地高平

郡高平縣地魏志高平有湖陸城方與縣地

劉宋陽平縣故城當在縣西南魏志魯郡陽平有滕城縣西

五十里有煬城俗傳隋煬帝駐蹕處疑是也又縣西十二里近滕城有

鞋城以形附存備考

後魏徐州彭城郡薛縣蕃郡治蕃縣孝昌三年置郡元象二年

併彭城武定五年復又永興縣永福縣皇興初置屬建昌郡太

和中屬彭城郡魏志永興下在太和十年武定五年屬又彭城留

縣地蘭陵郡昌慮縣合鄉縣兗州魯郡陽平縣高平郡高平縣  
地方與縣地北徐州東泰山郡南城縣地

魏志薛有薛城未詳所徙治又蕃有蕃城後魏迄今未再徙

治當是於東偏築今治所有即西偏故址

永興縣故城在東南七十里今臨城驛其地曰永興社其旁

有永興村

永福縣故城未詳縣志縣東南茱萸山下有故縣城備考

高齊徐州彭城郡蕃縣及沛郡沛縣地北徐州周沂郡南

武陽縣地南城周因之

寰宇記有後魏以後費縣移治薛固城之說縣東五十里薛



山下僻水南有固城卽僻固城周還治陽口則齊治此矣但

其前說並無此徙詳費縣未敢逕從梁天監五年桓和擊魏充州拔固城通鑑胡注云卽

抱犢固考是時蕭及屯固城桓和屯孤山魏樊魯破和於孤

山元恒拔固城魏志昌慮有孤山與僻固城相近當卽此固

城南齊時徐州民保五固兗州桓磊據抱犢固滕費之間

無考古城甚多固以五稱似不止一城也抱犢固卻無遺址

隋徐州滕縣開皇十六年改蕃縣爲滕縣又沛縣地沂州

彭城郡南武陽改顯與縣地且並非

齊乘隋以其爲滕舊都故改蕃爲滕縣按蕃非滕都且並非

唐河南道徐州滕縣及沛縣地沂州費縣地字記九域志

費縣並有滌水今費境無滌水割隸未詳何時據括地志郎屬

滕縣是隋唐時縣之西北境約與今同矣隋志抱犢山在蘭陵

而九域志則在滕縣今山在費

滕嶧三縣界疑隋代已如是已

舊唐志滕古滕國隋置縣按縣治旣非滕都縣境詎止滕地

據此竟似隋始於滕故城置縣者元和志滕縣本古滕國漢

蕃縣按以縣治言則非滕國以縣境言不止蕃縣寰宇記以

爲漢蕃昌慮二縣通考以爲滕小邾二國皆失挂漏齊乘云

漢晉蕃鄒二縣地愈不合縣境當戰國時並不能全屬齊不載明有僻國在內何以入齊乘耶

宋京東西路徐州滕縣置滕陽軍又沛縣地沂州費縣地

金山東西路滕州治滕縣大定二十三年升滕陽軍爲州二十

四年除陽字爲滕州

金志滕縣舊名滕陽大定二十四年更誤以軍名爲縣名

元都省山東益都路滕州治滕縣



明山東布政司兗州府滕縣洪武二年廢滕州縣屬濟寧府十八年來屬

國朝因之

縣志康熙五十五年修沿革六國時齊於小邾東置靈邱

眞想當然者魏武三年置昌慮郡誤建安作魏武古蹟又訛

郡作劉宋省戚入蕃繆後魏蕃城縣多城字隋升滕

郡繆金大定二十四年更置滕縣此因金志致誤古

蹟不知仲虺城所在反駁齊乘隱公四年狩於郎按狩

郎在桓四年

嶧縣

周偃陽國

東境爲郟國地北境西境爲邾魯薛諸國地後入宋又入楚

春秋襄公十年會於柤遂滅偃陽杜注今彭城傅陽縣寰宇

記楚宣王改偃陽爲傅陽按公羊卽作傅陽

漢徐州東海郡承縣陰平縣建陽縣新陽縣又繒縣地故城在東八十里

里今屬下邳縣地後漢志下邳有葛嶧山今蘭陵縣地故城在東六十

里今屬又楚國傅陽縣

承縣故城在西北一里

陰平縣故城在西南三十里今陰平集後漢書袁安傳章懷

注稱在承縣西南寰宇記稱在沭陽縣西北六十里

建陽縣故城在西微北四十五里詳俗曰建陵城



新陽縣故城在西北四十里今安陽城後漢書劉永傳帝破  
龐萌於桃城詳鄒縣萌蘇茂佼彊奔董憲與劉紆屯昌慮自將  
銳卒拒新陽帝先遣吳漢擊破之憲走還昌慮憲恐乃招誘  
五校餘賊屯建陽去昌慮三十里章懷注建陽城在沂州承  
縣北又云帝至蕃去憲所百餘里按縣西建陵城去蕃城正  
百餘里紀要以爲建陽之訛最當建陵城括地志亦稱在承  
縣界據水經注流水逕其東在厚邱之後不能在縣西也新  
陽城當在建陽北即安陽城無疑惟建陽既去蕃百餘里則  
去昌慮斷不止三十里三疑五字訛也  
傅陽縣故城在南五十里

後漢徐州東海郡承縣陰平縣彭城國傅陽縣琅邪國繒縣地  
下邳國下邳縣地魏陰平未詳省否

晉徐州東海郡承縣彭城國傅陽縣琅邪國繒縣地下邳國下  
邳縣地元康元年分東海於承縣置蘭陵郡後趙石虎改武興  
郡南燕慕容德并州治陰平城

劉宋徐州蘭陵郡治承縣又兗州魯郡新陽縣大明中復後魏  
廢蘭陵郡武定五年復郡治故承城高齊省新陽縣周因之

魏承縣即今縣治魏志承有承城而郡下云治承城蓋郡治  
故城縣治別徙縣境別無承城即徙今治無疑

隋徐州蘭陵縣開皇三年廢蘭陵郡十六年於承縣置鄆州



又析置蘭陵縣大業二年州廢省郛城蘭陵入承縣尋改承為蘭陵來屬

隋郛州城即今治東北有遺址蓋罷蘭陵郡而古承城廢後

置州於後魏承縣也

隋蘭陵縣故城在東四十里今蘭陵店此廢蘭陵城

隋志蘭陵下舊曰承置蘭陵郡開皇初郡廢十六年分置郛

州及蘭陵縣大業初州廢又併蘭陵郛城二縣入焉尋改承

為蘭陵按分承置郛州州字當是城字州不可云分承置也

此句上脫載置州之文 元和志承縣漢屬東海郡開皇三

年罷郡似隋罷東海郡矣脫載晉置蘭陵郡於前又失載隋

置郛州 寰宇記大業二年省郛州及承縣仍移蘭陵縣於

廢郛州城中按此似是而實非大業初第廢郛州未廢承縣

蘭陵與郛城省入承非承與郛城省入蘭陵改承為蘭陵非

移蘭陵治承城其故郛城下云大業初省入蘭陵按是二縣

同時省入承非郛城省入蘭陵

唐河南道

沂州琅邪郡承縣古皆作承舊唐志變作

武德四年於蘭

陵縣復置郛州改蘭陵為承縣復置蘭陵縣貞觀元年州廢省

蘭陵郛城

武德四年復見蘭山縣

二縣入承來屬五代因之

宋京東東路

沂州琅邪郡承縣隋唐宋縣境有今蘭山西境

齊乘古承縣城嶧州城西北小城晉已後蘭陵郡或理今州



城或理鄆城此城自爲承縣宋始移焉考晉宋後魏蘭陵郡皆治古承城地形志寰宇記有明據元嶧州城卽隋鄆州城鄆城卽漢繒縣郡治從未治此兩城隋蘭陵縣已在廢州城實後魏承縣治並非宋始移入其郡邑篇嶧州條云唐仍理鄆州城宋移理今縣考唐宋承縣皆仍隋舊如謂宋縣元州非隋鄆州寰宇記稱古承城在西北一里于氏亦稱是州城西北小城則宋元治所仍隋唐舊治明矣其古鄆城條云嶧州東八十里亦可證元州治卽隋鄆州治隋初鄆州理承縣城大業二年移蘭陵郡治此唐置鄆州理此城考唐鄆州固未嘗治鄆城隋大業二年蘭陵郡廢已久那有徙郡治鄆城事蓋于氏誤

以鄆城縣爲隋郡唐州治故一則云宋始移焉一則云宋移理今縣夫旣云此城自爲承縣則所稱宋始移者自是州郡治宋無鄆州又無蘭陵郡移治何所指耶縱使不誤書於嶧州條可也又書於古承城是又將古今兩城混爲一矣

金山東西路邳州蘭陵縣明昌六年改承爲蘭陵

金志貞祐四年三月徙治土婁村今縣南八里有土婁河

元都省山東益都路嶧州初於蘭陵縣置嶧州至元二年廢縣其地直隸於州

元復還今治金徙治後史無還治明文觀齊乘嶧州古蹟山川皆與今同則元初已還故治考證謂元當仍金治非也



明山東布政司兗州府嶧縣洪武二年降嶧州為縣屬濟寧府十八年來屬

國朝因之

縣志乾隆二十六年修沿革金復改蘭陵縣置嶧州明昌

初改縣興定中置州本元志金志無 古蹟舊土城在漢

承縣之南城臨承水相傳為隋鄆州城又疑為金徙之士

婁村按此因史無還今治明文而有此疑 安陽城相傳

為春秋戎州已氏之邑誤詳曹州嶧州舊城即今治相傳

楚將鍾離昧所築路史沂之承有鍾離城按鍾離城在江

南海州路史齊乘並誤詳蘭山此又以為今治反與隋鄆州

城分為二繆極

汶上縣

古厥國周魯中都邑闕邑厥入齊戰國為平陸邑

漢志東平陸下應劭注古厥國 孟子孟子之平陸

中都邑故城在西三十九里又名致密城一作殷密史記孔子世

家定公以孔子為中都宰

闕邑故城在西南南旺湖中春秋桓公十一年會於闕杜注

須昌縣東南有闕城按後漢志東平陸下有闕亭壽張下劉

昭注地道記曰有蚩尤祠皇覽曰蚩尤冢在縣闕城中按三

說不同蓋在三縣接界處也然須昌故城在今東平州西北



十五里關城不在其東南疑是西南之訛否則東字衍

魏志壽張有高陽城在縣西北三十里今日陽城宋書元嘉

八年檀道濟抵壽張轉戰至高梁亭紀要謂高陽即高梁之

訛最當考春秋僖公九年齊侯桓以諸侯之師伐晉至高梁

而還杜注晉地在平陽西南按平陽西南已深入晉境此傳

正應宰孔西則否矣之語似即至此高梁也備考

漢兖州東平國東平陸縣泰山郡桃鄉縣及東郡壽良縣地見上

須昌縣地後漢志須昌有致密城

東平陸縣故城當在縣北汶水南或曰即今治舊唐志漢平

陸縣本置殷密城質以水經注汶水所經其繆顯然詳水考

桃鄉縣故城在東北五十里王莽曰鄣亭魏志無鹽有南章城即此今桃城村

後漢志東平陸有堂陽聚劉昭注故縣後省考漢志兖州無

此縣或曰即泰山郡富陽之訛而王子侯表有富陽侯萌東

平思王子似無志表皆訛之理水經注疑春亭為堂陽亭詳寧

陽固非亦可證非漢縣名也漢鉅鹿郡有堂陽縣疑昭有誤

後漢兖州東平國東平陸縣及無鹽縣地桃鄉入之須昌縣地壽張

縣地魏晉因之

後漢志無鹽有章城其時章縣未省則桃鄉城也劉昭注引

左傳齊人降鄣於其下繆矣



劉宋兗州僑陽平郡治平陸故城又平原縣及館陶縣地魏志東陽

平館陶有唐陽城即堂陽亭又樂平縣寄治下平陸又東平郡平陸縣地縣

寄治郡城又壽張縣地高陽城隸濟州壽張見魏志後魏陽平郡加東字

魏志東陽平郡本東平地劉駿置治平陸城按平陸縣宋寄

治郡城其徙治中都未詳何時宋志樂平寄治下平陸當即

中都城詳下

劉宋陽平郡平原縣故城在西南三十里今平原社魏志東

陽平郡平原下有苦城即縣北胡城有鉅野澤今南旺諸湖

是汶水入茂都澱西出逕中都城南名巨野溝可證詳水道考

高齊兗州郡樂平縣并平陸於樂平徙平原於今寧陽周

因之

隋志平陸後齊曰樂平按宋魏東陽平郡樂平縣本治下平

陸隋改平陸至唐開元時猶治中都城是宋下平陸即中都

城紀要稱平陸晉末徙治中都似誤元和志齊高帝改平

陸為樂平按高齊無高帝如高祖改則仍後魏時矣當是高

齊字倒衍帝字齊并寄治之平陸於樂平非改平陸為樂平

隋兗州平陸縣開皇十六年改樂平仍名平陸

唐河南道鄆州中都縣初屬兗州天寶元年改平陸為中都

貞元十四年來屬復屬兗州尋還屬元和志天寶元年屬鄆州與唐志不符今從唐志與

寰宇記五代因之



中都縣卽今治舊唐志殷密城在今治西三十九里天寶元年改爲中都移於今治

宋京東西路東平府東平郡中都縣

金山東西路東平府汶上縣貞元元年改中都曰汶陽太和八年又改

元都省山東東平路汶上縣

明山東布政司兗州府東平州汶上縣

國朝山東布政司兗州府汶上縣初因明舊乾隆四十一年屬濟寧直隸州四十五年還屬

縣志明萬歷戊申年修知縣栗可仕沿革誤以平陸無

國朝康熙

年續

聞元吳

鹽兩縣爲厥國 春秋爲中都戰國入齊爲平陸按誤混

兩地爲一 東平陸東漢併入須昌晉因之按二代皆有

此縣 脫元代 古蹟有邾國城陽關城皆因金改汶陽

而附會者 不知桃鄉有南章之名反以水經注爲誤殊

失考

陽穀縣

周齊柯邑一曰東阿一曰阿邑

春秋莊公十三年公會齊侯盟於柯杜注今濟北東阿縣齊之阿邑猶祝柯今爲祝阿水經注以爲衛邑說苑晏子任東阿則齊邑矣杜氏猶祝阿云云見柯阿二字可通用耳元和



志引之截去今為祝阿四字文義遂不明了而寰宇記續通

典通鑑胡注皆以祝阿為東阿可怪已 史記田敬仲世家

威王召阿大夫而語之新序齊君使尹子奇治阿 春秋襄

十四年孫林父敗衛侯於阿澤杜注東阿縣西南有大澤水

經注河水自范縣倉亭津又歷柯澤逕東阿縣故城西是春

秋時柯已作阿

紀要縣有薛陵城在西南史記齊威王七年衛伐我取薛陵

威王語阿大夫衛取薛陵而子不知薛陵自近阿邑然烏知

確在縣境乎

漢兗州東郡東阿縣及范縣地

水經注引述征記倉亭津在范縣界東北去東阿六十里以今

里計當得五十里而近今治去東阿故城五十里元和志

穀縣漢須昌縣地按後漢志須昌有陽穀亭今在東平北東阿

南故志又云取東阿縣界陽穀亭為名隋置陽穀縣約得漢東

阿地十之六七其東南或有須昌地耳志因陽穀亭在須昌致

有須昌城後漢因之魏太和三年為東阿縣王國六年復故

東阿縣故城在東五十里今阿城鎮西二里齊乘兩漢有阿

陽縣無東阿縣繆何至此 水經注東阿魏曹雄侯國按三

國志曹植自雍邱徙封東阿王黃初五年諸王皆以縣為國太和六年復以郡此誤

晉兗州濟北國東阿縣及東平國范縣地須昌縣地太康後廢

東阿後燕慕容垂兗州治後燕錄慕容楷刺兗州鎮東阿宋初復又廢

元和志東阿晉太康後廢按宋志云晉無承初有而晉志實



有東阿史蓋據太康前也

後魏東阿縣地魏復置東阿於故城東二十里屬今齊周因之

隋濟北郡陽穀縣開皇十六年置西北當有武水縣地其故城今沙鎮在縣與聊城分界處

陽穀縣故城在東北三十里俗曰水沒城元和志陽穀縣古

伏城在縣東南二里通志稱在今縣東南二里今治東北三

十里有宓城集即伏城西北有古城縣志謂之水沒城云在

疊路橋西牆隅僅存以為無考考寰宇記陽穀縣開寶六年

河水衝破縣城則水沒城非隋縣城而何紀要稱在縣北五

十里又歷引春秋會盟陽穀事且云皆此地失考甚矣

唐河南道鄆州陽穀縣初屬濟陽郡天寶十三載來屬五代

因之唐博州河南地皆割入鄆州無武水縣地矣

宋京東西路東平府東平郡陽穀縣

宋陽穀縣即今治宋志陽穀縣景德三年徙孟店通考寰宇

記則稱太平興國四年徙上巡鎮舊說孟店即上巡鎮但年

地皆不同烏知非兩徙耶寰宇記既載徙治事古蹟河道仍

數差五里未必即據新治九域志俟再考河水壞城倉卒他

作州西北一百二十里則今治矣徙未違擇地後方

度地築城九域志陽穀有碣磳津蓋盧縣廢析入縣也今

未詳仍在縣境否故於漢不書有荏平地於隋唐不書有盧

縣地

金山東西路東平府陽穀縣



元都省山東東平路陽穀縣

明山東布政司兗州府東平州陽穀縣

國朝山東布政司兗州府陽穀縣

縣志 康熙五十五年修

知縣王時來

壽張縣

夏顧國周晉范邑戰國入齊又 顧邑

詩韋顧既伐元和志范縣顧城在縣東二十八里夏之顧國

也按唐范縣在縣西南二十里 今屬范縣 顧城在縣南境明矣近

志稱在今范縣南五十里大繆 春秋哀公二十一年公會

齊侯於顧先至陽穀即古顧國矣但未詳時屬何國 疑亦齊地

春秋宣公十七年左傳范武子請老杜注初受隨故曰隨武

子後更受范復為范武子不言范邑所在孟子孟子自范至

齊趙岐注范齊邑王庶子所封食也元和志范縣晉大夫士

會之邑古無此說考漢范縣接壤皆齊魯衛之地與晉土絕

不相接不能無疑四書釋地並用兩說以為春秋晉而戰國

齊也姑從俟再考 文公十一年晉有范無恤則晉有范氏亦不始於武子

漢兗州東郡范縣 漢書景祐本范作范 及壽良縣地 安民亭為壽張西境梁山亦古壽張地皆

在東平州西南縣之東南而後魏濟州壽張故城仍在漢壽張境內則縣有漢壽良地

范縣故城在東南二十里今范城橋 俗又名范王城 舊以今范縣東

南范縣故城為漢治非是彼乃魯秦邑 與水考瓠河故道參看便明 通志



壽張古蹟有范城是也而仍以彼為漢治何耶

紀要壽張有張城以為漢封毛釋之史記表作毛澤為張侯考漢廣

平國有張縣寰宇記云一名渚陽城又史記周勃傳襲取臨

濟攻張漢書作攻壽張誤後漢始改壽良為壽張則張城安得在壽

良乎

後漢兗州東郡范縣及東平國壽張縣地魏范縣未詳所屬

晉兗州東平國范縣及壽張縣地劉宋因之范縣寄治郡下

後魏濟州東平郡壽張縣兗州東平郡范縣

後魏濟州壽張縣故城在東南五十里後魏分壽張為兩壽

張縣一即此城一仍漢治屬兗州東平郡

後魏分范縣為兩范縣一仍漢治一治秦城屬濟州東平郡

高齊 州 郡壽張縣周因之

齊省兗州壽張入須昌存屬濟州者未詳屬何州郡兩范縣

亦齊省

隋濟 州 壽張縣及范縣地隋復置范縣北郡郡壽張縣地即治秦城者

元和志開皇十六年壽張縣屬鄆州隋志不載

唐河南道鄆州東平郡壽張縣武德四年析置壽良縣並置壽州五

年州廢省壽良入壽張來屬又濮陽州范縣地五代因之

壽良縣故城在東南六十五里元和志壽州故城在壽張東

南十五里隋末百姓築為堡武德四年於此置壽州按漏載



置壽良縣 通志壽州城引寰宇記隋末百姓云云又書隋末築堡於壽張故城條誤

宋京東西路東平府東平郡壽張縣及濮州范縣地

金山東西路東平府壽張縣及大名路濮州范縣地

大定七年河水壞城徙治竹口鎮在今縣西十里十九年還

故治九域志壽張有竹口鎮

元都省山東東平路壽張縣及直隸都省山東濮州范縣地

明山東布政司兗州府東平州壽張縣洪武三年省入陽穀須

城十三年復屬濟寧府後屬

明壽張縣卽今治明志壽張下洪武十三年復置又云洪武

十二年徙王陵店蓋十二年築城十三年復縣也

國朝山東布政司兗州府壽張縣

縣志



兗州府補遺

滋陽縣

子路宿石門四書釋地據寰宇記謂是魯城門抵城而門已闔  
 只得宿於外郭門又考水經注洙水過瑕邱城東又西南逕石  
 門約在今滋陽境內東去曲阜數十里或自魯他適宿此舉孔  
 氏自魯可知儻從外返魯似當稱地以答不當但云孔氏

漢書杜周傳杜欽說王鳳有云仲山父異姓之臣無親於宣就  
 封於齊蓋本韓詩外傳以徂齊爲就封無論齊樊異國與本詩  
 城齊亦不合矣雖然申伯作庸而因謝韓侯完城而用燕此韓  
順天府固安縣俗訛韓侯爲寒號皆鄰接之地命樊城齊近齊  
城舊注謂卽今韓城縣者非是

續山東考古金

兗補



可知樊如在周畿內無因有此誤說也春秋僖二十五年王賜晉陽樊服虔曰陽樊仲山父所居故名陽樊山河兩戒考謂平王東遷樊仲之孫食采於陽非故樊國竹書宣王十七年王命樊侯仲山甫城齊東平樊縣近齊樊故國當在是余初因兩漢志樊縣下皆不言本國周畿內又確有樊邑故未敢以此爲國觀杜欽語及兩戒考說復筆此以備考

兩戒考又引地理志曰樊縣古樊國仲山甫所

封未詳是何地志

### 曲阜縣

山河兩戒考漢書律歷志成王元年命伯禽於魯之歲紀年成王二年奄人徐人及淮夷入於邾以畔四年王師伐淮夷遂入

奄五年王在奄遷其君於蒲姑封魯在五年之前則奄不得在魯城內按費誓王伐淮夷魯侯已率師以從此說致爲有理紀年考證殷商地圖奄在今莒州北境諸城西北境未詳所據

### 寧陽縣

路史龔邱縣治故蛇邱甚誤

### 鄒縣

春秋昭二十二年大蒐於昌閒公羊作昌姦 漢魯相史晨後碑於昌平亭下立會市是昌平在漢爲亭名也 路史以閭邱顯閭爲一地又云閭邱本屬莒後屬邾鄒縣境內不得有莒地城冢記紀王城紀所遷按鄒之紀王城乃邾字轉音耳紀未



嘗遷此

晉書外戚褚裒傳魯郡山有五百餘家建義請授山字上當有鄒字

宋史曾孝寬傳知鄆州鄆有孟子廟孝寬請於朝得封鄆國公配享孔子按孟廟在鄒鄆屬充不屬鄆蓋宋鄆刺或兼京東西路安撫使充亦所統屬故孝寬上請也傳語殊不合

滕縣

春秋桓十七年及齊師戰於奚穀梁作戰於郎 路史滕古膠鬲國繆甚互詳前 又邾國曹姓從齊勤王為小邾子又別出小邾國以為邾之所分即滕縣又疑為曲阜之古邾城又以蕃縣

為邾國又以任城之邾婁為邾故國牽混矛盾極矣 又滕本徐屬縣後遷公邱而地為小邾故充之龔邱有古滕城按滕國故城本在公邱縣非後所遷公邱本是滕地非小邾充之龔邱縣即今寧陽並無滕城此將古滕城今滕縣漢公邱縣隋龔邱縣皆混為一 史記正義滕即龔邱故城是按滕國與公邱非一城兩漢志皆作公邱此似混入龔邱晉書載記龔邱亦作公邱二字古或通用

魏書揚播傳蕃郡人續靈珍受衍梁武帝名平北將軍蕃郡刺史按蕃郡非州不得有刺史或以寵新附姑假斯號歟

泗水縣



通志引紀年云湯伐有卞考紀年無此文而路史卞國下有湯代有卞隨之文引殊誤 括地志姑蔑故城在縣東四十五里

汶上縣

路史以闕鄉闕城闕亭為三地甚誤

隸釋王純碑在鄆州中都縣金石錄云水經濟水逕須句城西注云水西有安民山山西有漢冀州刺史王紛碑漢中平四年立按地理書須胸即今中都縣此碑在中都又其官與姓氏皆合疑其是也然以純為紛以延熹為中平則疑水經注之誤綬按中都今汶上須句今東平安民山西漢須昌縣地隋唐以來壽張縣地與中都無涉似非一碑也

唐書宗室傳齊物天寶初擢累陝州刺史開砥柱通漕路發重石下得古鐵戟若鏃然銘曰平陸上之詔因以名縣按鄆州平陸縣改名中都以與彼同名故也

寰宇記中都縣五代周廣順二年屬濟州其年十二月卻入鄆州

嶧縣

括地志鍾離故城在沂州永縣路史齊乘並沿其誤

辨詳前

魏志彭城郡呂縣下有偃陽城未詳何時省入呂縣前後魏提綱缺書呂縣地

元史順帝紀至正八年滕嶧二州隸徐州總管府



陽穀縣

晉書孝武紀太元十二年慕容垂寇河東濟北太守溫詳奔彭城以天文志核之當作寇東阿

唐書藩鎮劉悟傳魏師踰河取盧縣壁阿井城中按阿井城卽漢東阿縣城亦可爲唐東阿非漢治之證

續山東考古錄卷之二十

滄州葉圭綬子佩甫述

沂州府上

蘭山縣

周邠國後入魯爲啟陽邑又邠國後亦入魯又魯中邱邑祝邱邑向邑次室邑一作漆室後入楚爲蘭陵邑又旣邑

春秋昭公十八年邾人入邠杜注今琅邪開陽縣又哀公三年城啟陽注同今縣治正邠國地

又僖公十四年季姬與鄆子遇於防杜注今琅邪繒縣

中邱邑故城在東北五十里又名諸葛城又名王僧辨城今



葛溝鎮地與沂水分界春秋隱公七年城中邱杜注琅邪臨

沂縣東北水經注沂水自陽都東南逕中邱城西又南逕臨沂縣

故城東葛溝鎮在沂水東臨沂故城東北正其地齊乘云王

僧辨城土人目為諸葛城元和志王僧辨城在臨沂東北五

十里唐縣今治府志諸葛城即中邱城最當三名實一城耳府志

別見王僧辨城不合

春秋桓公五年城祝邱按即漢即邱縣

向邑故城在西南一百二十里今向城鎮春秋地名向者凡

三一文公十一年會吳於向杜注在潁川長社縣東北蓋鄭

邑與今山東無涉一桓公十五年冬城向此內城書法而向

國已入於莒此向自為魯邑今縣西南向城鎮是一隱公二

年莒入向宣公四年公及齊侯平莒及邾莒人不肯公伐莒

取向此為向國後為莒邑通典莒縣下云漢向縣故城在今

縣南寰宇記莒縣南七十里有春秋時向邑故城今莒州南

向城是乃杜預於莒入向以為譙國龍亢縣東南之向城據

漢志沛郡向縣下故國春秋曰莒人入向之文也於宣四年

取向則又以為東海承縣東南之向城即縣之向城鎮也而疑其遠

夫龍亢今安徽之懷遠縣顧反不遠耶蓋杜預不知莒國南

別有向城耳杜佑知之而以為漢向縣則甚繆樂史以為邑

而不知為國齊乘以此向城為向國而又引寰宇記向城在



莒縣南之文且云蓋今沂州之向城鎮則將兩向城混為一  
 左傳補正疑龍亢為遠以于氏說近是不知杜預已有此說  
 前錄亦從于氏說以為只一向先為國後并於莒而或屬魯  
 抑知莒州南縣之西南明明有兩向城乎齊乘此條沂州誤  
 作沂水考證辨之  
 亦不知有兩向城今據通典寰宇記以在莒州南者為國為莒邑據  
 桓十五年經文以在縣西南者為魯邑較允若漢縣自當以  
 在懷遠者為是此城所近皆東海郡屬斷非沛郡向縣莒南  
 向城更無庸辨

琴操魯漆室女倚柱悲吟而嘯漢志蘭陵孟康注次室亭魯  
 伯是三字似有脫誤後漢志蘭陵有次室亭劉昭注地道記曰故魯

次室邑列女傳有漆室之女或作次室 史記孟子荀卿列  
 傳荀卿適楚為蘭陵令

春秋莊公九年公及齊大夫盟於蕪杜注繒縣北有蕪亭蕪  
 縣或在嶧縣或在費縣  
 皆無確據姑係此備考公羊傳蕪字作暨路史云沂之承有  
 蕪亭其時今蘭山  
 西境皆承地近志蕪邑仍係嶧  
 縣但今繒城之北實無嶧地也

後漢志臨沂下劉昭注隱六年盟於艾誤引杜注詳蒙  
 陰齊乘  
 引不誤而仍謂艾在沂州西三十里艾山下何耶又原注有  
 叢亭劉昭注博物記曰縣東界次睢有太叢社民謂之食人  
 社即次睢之社按春秋僖公十七年宋公使邾文公用鄆子  
 於次睢之社欲以屬東夷杜注睢水受沂逕陳留譙城彭城



縣入泗此水次有祆阿憐切神東夷皆社祀之臨沂固近繒然非睢水所逕疑有誤

齊乘鍾離城沂州西南百餘里路史云鍾離徐之別封今沂之鍾離城乃晉吳會處其後徙九江吳滅之郡國志謂此城楚將鍾離昧所築按春秋成公十五年會吳於鍾離杜注楚邑淮南縣漢志九江郡鍾離應劭注鍾離子國晉志屬淮南安得在沂州西南耶又考元和志海州朐山縣有鍾離昧故城在縣南百里項羽將鍾離昧所築昧卽此縣人按朐山縣西北百四十步卽宋泰始五年僑置之琅邪郡城寰宇記作廢沂州城考周改北徐州爲沂州宋無此州名隋志朐山縣舊曰朐置琅邪郡後周改郡縣皆曰朐山樂氏因隋唐宋之沂州亦稱

琅邪郡遂是鍾離昧所築城在僑琅邪郡之南百里後人誤誤加於彼指實土至以爲吳晉會處又杜撰徙九江之說愈繆矣

春秋隱公十年會齊鄭於中邱癸丑盟於鄧縣西南八十里

有鄧王城疑其地  
漢徐州東海郡開陽縣臨沂縣蘭陵縣利成縣繒縣戚縣卽邱縣北境當有陽都縣地西南當有襄賁縣地

開陽縣故城在北十五里通典臨沂有開陽縣故城襄賁縣故城在今縣南按末句承襄賁城來開陽城不在唐縣南也臨沂縣故城在北五十里今臨沂社

蘭陵縣故城在西南百六十里今蘭陵集



利成縣故城在東一百里又名監官城寰宇記海州懷仁縣

利成故城在西六十里今在縣與郟城江南贛榆接界處

繒縣故城在西南百一十里俗讀繒如層曰層城

戚縣故城當在縣西括地志臨沂縣有戚縣故城按晉分戚

屬蘭陵郡則在縣西矣疑卽縣西南四十里之舜歌城戚縣

音訛爲七弦俗又附會於舜歌耳或曰舜五弦則此疑非余曰此等附會不須泥此

卽邱縣故城在東南五十里俗曰禹王城齊乘以爲新城誤

府志琅邪魏其縣在縣境未詳所據通志同

後漢徐州琅邪國治開陽縣永平五年自莒徙國來治又臨沂

縣卽邱縣繒縣東海郡蘭陵縣戚縣利成縣建安三年於利成

縣置利成郡十一年戚縣屬琅邪魏琅邪爲郡晉書解系傳父脩魏琅邪太守

廢利成郡晉琅邪復爲國元康元年蘭陵戚二縣屬蘭陵郡詳下

江左別僑置琅邪國南燕慕容德幽州治發干戍

後漢書光武紀章懷注城陽國故城在今沂州臨沂縣南按

在臨沂南者卽開陽蓋因後漢城陽并入琅邪而誤唐臨沂

縣卽今府治開陽故城在漢臨沂縣南不在唐縣南

補三國志黃初六年通鑑在五年利成郡兵蔡方等以郡反殺太

守徐質此後不復再見疑因方等反郡遂廢也姑從之寰宇記利

成縣後魏獻帝曾於此立郡後魏當作後漢圖經云晉利成仍爲縣似魏世終有此郡矣

晉書元帝紀永昌元年琅邪太守孫默叛降於石勒是東晉



已改國爲郡補東晉志引此而仍稱國似不合其補十六國志後趙稱國前燕稱郡前秦據前秦錄苻堅以徐攀爲琅邪太守稱郡後燕南燕又稱國尤不合通典宋改爲郡亦未核元和志晉元帝於琅邪郡城置發干戍以南軍鎮之然則卽開陽城矣齊乘稱沂州東北有小營城晉發干戍營似誤補十六國志南燕幽州下晉志德以幽州刺史鎮發干按德蓋仍晉幽州舊名置此發干卽元帝所置發干戍晉志陽平郡有發干縣諸地志以爲德幽州治所今考德雖置五州皆不出青徐二州境且晉本於徐土置幽州德蓋又仍晉之舊晉志江北又僑立幽冀青并四州義熙時又綬按此說最當以幽冀合徐州今未詳治所故於東晉不書

晉書荀崧傳慕容儁將王騰等寇琅邪鄆城荀美自下邳討之紀要稱東晉僑立鄆城縣於沂州東北無據或邳城之訛劉宋徐州琅邪郡治卽邱縣

後魏北徐州治琅邪郡治卽邱縣永安二年置州州治卽今縣治又徐州蘭陵郡蘭陵縣

高齊北徐州治琅邪郡卽邱縣

寰宇記沂州理城後魏北徐州城也

後魏卽邱縣故城在西二十里魏志卽邱有卽邱城又有繒城臨沂城後魏亦有臨沂縣今未詳治所蓋得漢之三四縣地西境甚大故

移治於此齊乘以爲厚邱城考水經注沭水逕厚邱在卽邱



之後此城在漢寰宇記厚邱城在沭陽縣北四十六里以此

當之可乎 隋志卽邱帶郡考宋魏郡領卽邱費二縣卽治

卽邱無疑疑宋卽邱已徙此南北朝輿地表劉宋琅邪治費縣第以宋志首費縣耳不可從

宇文周沂州治琅邪郡治卽邱縣武帝改北徐州曰沂州

隋沂州治臨沂縣開皇十六年分卽邱復置臨沂縣又置郿

城縣屬郿州大業二年省郿城入蘭陵省卽邱入臨沂來屬又

徐州彭城郡蘭陵縣地

開皇十六年至大業元年臨沂故城在縣東北三十六里又

名郿城大業二年移入郡城卽沂州城大業時稱郡寰宇記臨沂縣高

齊省開皇復置於今縣東北三十六里今本作二十六里其郿城條作此數通志

作四故郿城又云卽邱後齊廢考隋志臨沂舊曰卽邱開皇

十六年分置臨沂大業初併卽邱入焉是齊未廢卽邱也齊

廢之臨沂亦與漢治無涉記又謂郿城爲魯叔孫氏邑考郿

城在今東平州水經注有明據左傳定公十年侯犯以郿叛

駟赤先奔宿宿城在郿城北甚近足證酈注之不誤此非叔

孫之郿明矣齊乘反是此而非彼何耶

隋郿城縣卽漢縣城

唐河南道沂州治臨沂縣及承縣地武德四年析置蘭山臨

沭昌樂三縣復置郿城縣屬郿州又析朐山置利成縣屬海州

六年省蘭山臨沭昌樂入臨沂八年省利成入懷仁貞觀元年

蘭山縣



省鄆城入承五代因之

蘭山縣故城在南八十里今新城

友人蘭山密雲路云縣南八十里沂水西流水東有

古城址隔武水有蘭山舊志稱蘭山縣故城在今縣南八十里正指此城土人名曰新城而齊乘所謂新城今名禹王城

考水經注流逕即邱縣沂水不云逕即邱則新城為唐蘭山縣城即邱城即禹王城矣

臨沭縣治今不可考縣東有臨沭鄉

昌樂縣治當在縣南縣南四十里有昌樂社

州志作常樂

舊唐志沂州漢東海郡之琅邪縣按漢琅邪縣屬琅邪郡在

今諸城並非唐之臨沂其臨沂下云後魏置郯郡又改為北

徐州並在此縣按後魏郯郡治郯縣北徐州城即今縣城並

非郯郡改蓋唐元和以後郯縣亦并入臨沂而後魏郯郡又

有別置之臨沂縣遂致此繆

宋京東東路

沂州琅邪郡

防禦治臨沂縣及承縣地

金山東東路沂州防禦治臨沂縣

金蘭陵西境入臨沂見齊乘

元都省山東益都路沂州治臨沂縣

明山東布政司兗州府沂州洪武元年廢臨沂縣其地直隸於

州屬濟寧府五年屬濟南府七年屬青州十八年屬

明志沂州元屬益都路後省州治臨沂縣入州洪武元年屬

濟寧府似臨沂元末廢而元志不載今姑從州志

國朝山東布政司沂州府治蘭山縣初因明舊雍正二年直隸

布政司十二年升沂州為府並復置蘭山縣為府治



沂州志康熙十三年修知州邵士置縣後尚無縣志沿革並屬縣在內周封五國三

日費按費之為國無確據詳費縣又邑凡八五曰新城八日

郟按郟邑沿寰宇記之誤以新城為鄭新城邑繆甚漢

改琅邪郡為東海郡置縣凡十有三按漢琅邪東海兩郡

並置東海領縣三十八非十三如以州境言又不當及承

與昌慮東漢分東海置琅邪國繆南宋置南琅邪郡

與州無涉隋屬河南道繆古蹟古城皆無方向里數

郟城縣

周郟國後入越又入楚又魯襄賁邑

春秋宣公四年平莒及郟竹書紀年晉烈公四年於粵伐郟

以郟子鵠歸按卽漢郟縣又定公三年仲孫何忌及邾子

盟於拔杜注以為地闕左傳冬盟於郟修邾好也杜又云郟

卽拔也按經傳合觀拔當係郟地疑亦在縣境公羊作枝

魯連子陸子謂齊潛王曰魯費之眾臣甲舍於襄賁卽漢縣

漢徐州東海郡治郟縣漢初名郟郡後改東海屬楚國景帝二

年屬朝廷楚元王傳王戊為薄太后服私姦削東海郡又襄賁縣又利成縣地詳蘭山郟

城有利成社志作和成筆誤

郟縣故城在城北有遺址縣志圖北門外有郟子東城郟子西城實一城耳縣府志

並稱今城北古城為古郟國秦漢郟縣城考水經注沂水過

襄賁縣東屈從縣西南流又屈南過郟縣西元和志下邳縣



故郟城在縣東北百五十里寰宇記同又稱在沂沭二水之間周十餘里其懷仁縣引太康志云祝其城在郟東九十里齊乘郟城在沂州東南百二十里縣北古城西南至舊郟州東至祝其故城在江南贛榆西南懷仁故城南四十里西北至府里數既符又在沂東沭西稱名未改即古郟城無疑紀要稱在郟州東北八十里蓋泥於元和志寰宇記係下邳而云然不知元和初郟古城本屬下邳後又隸臨沂寰宇記仍係下邳本不合不然元初郟未復縣于氏云云指何城耶乾隆志稱在縣西臆度無確據 漢書高紀六年以碭郡薛郡郟郡三十六縣立弟文信君交為楚王知漢初仍名郟郡地志以為高帝置東

海郡改名當在六年後矣楚元王傳作薛郡東海彭城三十六縣周勃傳項籍死東定楚地泗水東海郡或史追稱之襄賁縣故城在西少北六十里今長城店通典襄賁故城在臨沂南沂州志襄賁城今長城蓋襄字形近長音復相似因訛作長耳然此城今在縣境非蘭山地唐屬臨沂齊乘稱襄賁城與鍾離城相對俗曰鑿城按于氏所謂鍾離城實在今海州宋泰始五年於今安東縣北三十里東海王城置襄賁縣其城又名金城唐曾於彼置金城縣見寰宇記漣水及下邳縣下鍾離城正與相對則此襄賁乃劉宋縣非漢縣鑿字蓋金字傳寫之訛似與其上文之字誤合為一字今蘭山西南七十里有柞城見雜考通志臆揣



卽鑿城府志旣以長城爲襄賁又以爲柞城是皆未明于氏之誤耳

後漢徐州治東海郡治郟縣後漢志郟訛剡及襄賁縣又利成縣地建

安十一年郟襄賁益琅邪未詳何時復故魏太和六年東海爲國晉泰

始中爲郡城陽王子祗封東海王卒無後惠帝時復爲國高密王子越封此宋省郟縣

後漢廢太子疆封東海王魏志郟郡漢高改東海後漢爲國

晉復而後漢志東海稱郡或以東海王都魯縣故也然後漢

有魯相又有東海相則東海不得稱郡補三國志稱魏黃初

中作國亦未核 三國魏紀建安十一年割東海之襄賁郟

戚以益琅邪按東海治郟郟改屬未詳郡治何所晉郟襄賁

仍屬東海魏代二縣未詳何屬補志屬東海未敢從

劉宋志東海太守下明帝失淮北僑立青州於顛榆縣泰始

七年又立東海縣屬東海郡今海州東有東海廢縣卽其青

州治州北二里卽其東海縣及郡治唐移縣於州城其襄賁故城在

州城南百二十里卽金城是明帝失今郟城縣地襄賁已自此

徙彼也卽隋之漣水縣紀要沂州襄賁城漢縣後漢晉因之宋仍屬

東海郡似混僑縣實土爲一又云東晉時縣徙於東南境淮

水北岸亦誤宋爲晉

後魏東徐州郟郡治郟縣武定八年改東海爲郟郡高齊省郟

縣及郟郡



後魏臨沂縣屬郟郡其故城入卽邱所移治似當在縣境縣

西北十里縣志作西三十里密得軒云在西北不止三十里有故縣莊自府城視

之在西南且在沂水西其非漢郟縣城甚明疑卽後魏臨沂

縣也備考

齊天統閒造像題字有云亡考東海太守郟城戍主寰宇記

郟高齊廢蓋郡縣同廢戍主兼東海太守也魏書盧元傳有郟城戍

宇文周郟州郟郡治郟縣大象元年郡縣並復

隋泗州郟縣開皇初廢郟郡來屬

唐臨沂縣地南境當有武德四年郟縣屬郟州貞觀元年省入下郟曰郟城鄉袁字記孔望山在郟城鄉

元和中復又省入臨沂五代宋金

元因之

明山東布政司兗州府沂州郟城縣洪武初置

郟城縣卽今治縣志縣城元末沂州守禦王信築土城蓋城

元築而縣明置

國朝山東布政司沂州府郟城縣初因明舊雍正二年屬沂州

直隸州十三年州升府仍屬

縣志明萬曆十三年修國朝嘉慶十五年續知縣張若愚沿革楚滅郟當在

頃襄考烈之世據史記頃襄時楚人有好以弱弓微繳加

也此第舉四小國爲文不足爲郟尙存之證按當據紀年秦以是城轄薛郡

分轄琅邪郡按不書秦郟郡非無本然謂轄二郡是城何



物而轄郡耶 元初罷臨沂至正間復古無此說下又云  
明改縣為郯城其意或謂改郯為郯城而承上文言竟似  
元至正間復置臨沂明改今名矣 論曰郯或入楚或隸  
琅邪而又有臨沂之名按竟不知為漢晉東海郡國治直  
以郯城為臨沂尤繆

費縣 顏師古曰音祕通鑑胡注費字有兩姓一音蜚嬴姓出於伯益之後其一音祕姬姓出於魯季友按春秋之初已有費伯不必皆出季友也今山東稱費縣皆讀作蜚音非是

周魯費邑武城邑台邑東陽邑邱輿邑防邑又鄭昉邑後入魯  
又顯與國武城後入齊戰國曰南城 東南當有鄆國地

書費誓史記魯世家作肸徐廣曰一作鮮一作獮裴駢案尙

書作柴孔安國曰魯東郊之地名也書纂言云肸即費字傳

寫不同 鮮肸形近肸獮音近肸亦作肸說文作柴誓作柴作柴皆誤 書傳旁通云春秋之

初費自為國隱公元年費伯帥師城郎後為魯季氏邑然則  
伯禽時費決非魯地但魯為方伯費在屬國之中其時徐戎  
必寇費故伯禽征之耳按費去曲阜百餘里似非東郊地周  
初或為魯附庸或竟黨徐戎征而滅之遂為魯地皆未可知  
若春秋初則已入於魯費伯帥師城郎杜預以為魯大夫傳  
書法皆法經文其為魯臣甚明蓋費氏伯字非費國伯爵也  
竹書紀年夏啟二年費侯伯益出就國即胡三省所謂音蜚之費非此費也 元和志費縣古費國  
吳氏當本諸此古無明據未敢從 戰國時費蓋自為小國



孟子有費惠公新序魯人攻鄆曾子辭於鄆君曰請出寇罷復來即曾子居武城事其時武城分入費也特越寇魯寇傳聞異耳儼與魯為敵國矣即漢費縣

春秋襄公十九年城武城杜注泰山南武城縣自古迄明初無異說明成化後忽以嘉祥之後漢金鄉縣城當之前錄辨之已悉明費人王雅量有曾子居武城考實見通志闕里志辨駁尤詳史記田敬仲世家

威王曰使檀子守南城元和志以為即漢南城縣

春秋宣公十三年莒人伐我東鄙圍台杜注費縣南有台亭東陽邑故城在縣西南六十里今關陽鎮春秋哀公八年左傳吳師伐魯故道險由武城克東陽而進舍於五梧後漢志

南城下有東陽城

劉昭注夏孔甲遊田於東陽蕢山按是否即此東陽無確證

魏志南城

下有東安城即東陽訛也王雅量以為關陽鎮北二十里之東陽村並存備考

春秋哀公十四年左傳阮氏葬司馬牛於邱輿杜注泰山南武城西北有輿城

防邑故城在東北四十里今防城村春秋隱公九年公會齊侯於防杜注在琅邪華縣東南後漢志蓋縣劉昭誤引此注

蓋縣漢屬泰山晉屬東莞不屬琅邪華蓋形近而訛耳此會謀伐

宋杜氏以為此防或以視他防邑去宋差近歟定五年季平子行東野丙申卒于房似亦此邑補正云房疑即防是也

春秋隱公八年鄭伯使宛來歸祊杜注在費縣東南詳下



顓臾國故城在西北八十里春秋僖公二十一年左傳顓臾風姓也杜注在南武陽縣東北

漢徐州東海郡費縣南成縣兗州泰山郡南武陽縣華縣

費縣故城在西北二十五里 王念孫曰漢書王子侯表蕢侯方師古曰蕢音口怪反字或作

費音扶未反又音祕按蕢字從草貴聲音求味口怪二反不音扶味反亦不音祕且不得與費通蕢當為蕢字之誤也蕢字從艸賁聲賁音奔又音彼義反故蕢音墳又音扶味反又音祕聲與費同故字亦相通師古不知蕢為蕢之訛故音口怪反史記蕢作費索隱曰蕢音祕又扶味反蕢與蕢字異而音同即東海費縣也又索隱云表在琅邪琅邪東海二郡相連故志在東海而表在琅邪今本末一格脫琅邪二字當補入

南城縣故城在西南八十里 元和志作九十里

南武陽縣故城在西北九十里 顓臾城西南十里

華縣故城在東北六十里

後漢兗州泰山郡費縣南城縣南武陽縣初省華縣後復魏因

之後漢永平二年以泰山之南武陽華益琅邪五年又以華蓋南武陽等五縣易東海之開陽臨沂是永平五年華猶未省也泰山都尉孔宙碑陰有華縣時在延熹七年則已復置也三縣還屬泰山未詳何時據碑則延熹時華已復屬泰山三國魏志臧霸傳泰山華人則終魏世華屬泰山矣補三國志華屬琅邪郡殊為失考也

晉徐州琅邪郡費縣華縣兗州泰山郡南武陽縣南武城縣南 即城改羊祜傳武帝詔分泰山南城等五縣立南城郡祜辭不果行然則晉初猶未改名也

劉宋徐州琅邪郡費縣兗州泰山郡南城縣武陽縣

後魏北徐州琅邪郡費縣東泰山郡南城縣武陽縣

東泰山郡領南城新泰武陽三縣皇興三年置屬兗州永安



中屬北徐州郡治史無明文疑卽治南城也南北朝輿地表以爲治南城

魏志南城有武城未詳徙治何所寰宇記南城武城並見據杜預說南城武城自是一

城樂氏或指後魏治也惜無去縣里數

高齊北徐州琅邪郡費縣 武陽縣 東泰山郡齊周省否古無明據

宇文周沂州琅邪郡費縣 武陽縣 隋志顯與舊曰南武陽史偶用古名

隋沂州費縣顯與縣開皇十八年改武陽爲顯與隋亂費縣

廢 唐志武德四年復置費縣則隋亂廢矣疑顯與亦亂廢而唐初復置者

隋費縣卽今治魏志費縣有費城寰宇記費縣宋屬琅邪郡

自漢費縣移理祊城後魏孝文帝太和二十年又自祊城移

費縣於今縣城北四十里陽口山齊乘蒙山前有陽口村 隋開皇三年

復自陽口移入祊城今縣理也此一說也又云縣理中城後

魏太和二十年築以置費縣周迴二十里外城卽故祊城後

移理薛固詳滕縣近志以顯與城爲薛固城不足據 周移陽口山南隋又移入祊

城此又一說也一人之書寸楮之內矛盾如此極力考訂迄

無定論隋迄今未再徙今治猶有中外兩城山川古蹟與元

和志寰宇記方向里數悉合似今治卽祊城矣而水經注治

水實經祊城之南今名浚河今治卻在水南此水兩岸皆山斷無

改流之理而縣東浚水北又有古城土人猶名爲祊則所謂

隋還祊城者亦不足憑矣齊乘云祊城今縣理土人乃以陽

口城爲祊城又呼爲許田城皆誤按土人所謂祊城在東南



並非以陽口城為祊而浚南又別有許田城亦非呼祊為許田也其引寰宇記云自漢費縣移理祊城不承上文宋屬琅邪郡來何代移祊城耶紀要又誤看此句竟稱後漢移祊城尤為乖舛近志從前說者多而不知與後說牴牾間有兼採兩說者亦無的據茲於隋代定為今治宋魏周之移徙統俟再考

唐河南道沂州費縣武德四年復貞觀元年省顓臾縣入之

五代因之

宋京東東路沂州琅邪郡費縣

金山東東路沂州費縣

元都省山東益都路沂州費縣

明山東布政司兗州府沂州費縣

國朝山東布政司沂州府費縣初因明舊雍正二年屬沂州直

隸州十二年州升府仍屬

縣志康熙二十八年修沿革漢為徐州東海郡東漢為兗

州泰山郡地北魏為徐州泰山琅邪二郡地按兩漢專據

費縣言後魏又及泰山郡則並武陽南城言豈兩漢無此

二縣耶費屬琅邪自晉始越晉宋而及北魏豈晉宋並無

費縣耶況後魏武陽南城屬北徐州東泰山郡不屬徐州

泰山郡泰山郡屬兗州不屬徐州 古蹟有息城梁邱城



皆無稽又有鄆城非縣境其名宦首閔子真誣蔑先賢

續山東考古錄卷之二十一

滄州葉圭綬子佩甫述

沂州府下

莒州

周莒國都又鄆邑或屬魯又渠邱邑又向國後入莒莒滅於楚又入齊

春秋隱公二年莒人入向杜注莒國今城陽莒縣詩以按徂旅孟子作

以遏徂莒韓非因有文王克莒之說路史從之以爲卽此莒國王應麟載其說於困學紀聞蓋廣異聞耳未敢從

春秋文公十二年季孫行父帥師城諸及鄆杜注姑幕縣南有員亭卽鄆也昭元年取鄆按鄆在姑幕縣南四十里則在



州北境不在沂水境卽劉宋東莞縣詳下及沂水○古圓字多作員與運鄆雲瑗古

音皆通鄆城以正圓得名漢東莞縣本鄆邑地後於其縣立郡兩城亦仿其制故南燕於郡故城立團城鎮今沂水城仍

正圓也○昭公處鄆西鄆也後漢志東莞縣下劉昭注引公處鄆殊謬○魏書鹿念傳青州軍救琅邪次鄆城卽鄆城

又成公八年左傳晉申公巫臣與渠邱公立於池上杜注莒

縣有蘧邱里按九年楚伐莒渠邱先潰次莒次鄆自南而北

渠邱在莒南明矣安邱渠邱亭乃前漢北海安邱所改非是

向國故城在南七十五里詳蘭山

戰國策勃貂謂法章曰王走而之城陽之中山按法章後爲

莒大史敷家傭城陽正莒地疑莒別邑名戰國已有之矣

漢兗州城陽國治莒縣初爲城陽郡屬齊高帝六年以城陽等六郡封齊又呂后紀

齊王乃上文帝二年析齊置城陽國史記漢興以來諸侯年表

城陽之郡文帝二年析齊置城陽國孝文前元年初置城陽郡

郡當十一年爲郡仍屬齊共王喜徙淮南十六年復爲國喜還又徐州

琅邪郡姑幕縣靈門縣箕縣裨縣析泉縣高鄉縣高廣縣新山

縣高陽縣又東莞縣地鄆亭漢東莞地見漢志孟康注○十三州志海曲故城在開陽東百三十里按

開陽在蘭山縣北其東百餘里已入州境此東海郡之海曲縣疑治所亦在州南也

莒縣卽今治舊唐志莒縣漢屬東海郡誤

姑幕縣故城在東北一百六十里此本寰宇記據水經注姑

幕城在浯水之北據博物記公治長墓在城東五里今墓在

諸城西北四十里錫山側故一統志列姑幕於諸城州志謂

卽今石阜集再考應劭以姑幕爲薄姑非是



靈門縣故城在北百 里寰宇記莒縣靈門按郡國縣道

記云在今縣西南六十里當沂水縣東北一百里有巨平山

在山北浯水側近今無址按郡國縣道記唐賈耽作所謂今

縣未詳所指或曰似指輔唐縣樂氏引之竟似在莒縣西南矣最足

貽誤一統志謂即今石阜集石阜集在浯水北而水經注不

云浯水逕靈門縣城南未敢從

箕縣故城在東北百 里元和志莒縣濰山在縣東北八

十三里寰宇記誤作三十八里水經注濰水導源濰山東北逕箕縣故

城西是箕縣城當在州東北濰水東南寰宇記箕縣故城在

莒縣東北一百餘里是也府志箕城在州西北七十里誤

裨縣故城在南 里寰宇記裨漢志注云夜頭水經裨南

至海又輿地志云向水南至海夜頭向水蓋異名裨蓋在今

縣南故向城按此究無的據未敢逕從

析泉縣故城在東北 里水經注濰水自箕縣又東析泉

水注之水出析泉縣北松山東南逕析泉縣東又東南逕仲

固山東北流入於濰濰水又東北逕諸縣故城西又東北涓

水注之按仲固山在日照西北百二十里一作龍姑山其東姑又作骨

有膏澤河在諸縣城西似即析泉水諸城志松山在莒州北

境沈流莊西北其東南七十里為仲固山其圖仲固山正在

膏澤河西岸析泉故城當在仲固山西北莒州境內寰宇記



稱當在分流山東北山有涓水源即古析泉水是混兩水為一考分流山在仲固山東南析泉城能在其東北耶齊乘竟以分流山為松山矣

高鄉縣故城在東南七十三里此本寰宇記齊乘疑即州南十字路其地至州百里未敢從

寰宇記高廣縣在莒縣南界 又新山縣在莒縣界

高陽縣故城在東南 里今高羊社

後漢徐州琅邪國莒縣建武十三年并城陽國入琅邪建武二年封春

陵侯嫡子社為城陽王十一年薨 改琅邪郡為國來治永平五年徙治開陽國

魏志注英雄記呂布屯下邳時有東海蕭建為琅邪相治莒當在獻帝初也未詳何時還治開陽 又姑幕縣又

東莞縣地建安三年復置城陽郡後移治東武漢徙魏徙或復置即治彼或自

此徙彼皆所未詳以舊治莒姑係於此 莒姑幕並割屬魏因之

補三國志城陽郡漢置國中興後省入北海按城陽領四縣

後漢省慮入蓋莒東安陽郡皆屬琅邪晉志城陽郡漢置屬

北海乃兗州傳寫之誤洪氏誤蓋由此

晉青州城陽郡莒縣姑幕縣太康十年二縣屬東莞郡元康十

年移東莞郡來治莒縣南燕慕容德徐州治鄆城晉割屬姑幕

寰宇記惠帝東莞郡移理莒城又云南燕慕容德以尚書潘

聰為徐州刺史鎮莒城補十六國志南燕東莞郡莒城縣下

云漢莒縣城字蓋惠帝所增晉書載記燕二年德進據莒城



續山東考古錄 卷之三十一  
晉守將仕安委城遁德遣劉綱追斬辟閭渾於莒城綬按遍考晉宋魏地志無莒改莒城之說莒城猶言莒縣城耳洪氏未免過泥

劉宋徐州東莞郡治莒縣又東莞縣

劉宋東莞縣故城在北百二十里今東莞集隋志東莞縣有箕山維水後齊併姑幕入焉考鄆城在姑幕南四十里姑幕城在州北稍東百六十里東莞集方位里數皆符一統志沿革表謂隋縣卽鄆城是也杜預京相璠並稱姑幕鄆亭而酈道元稱漢縣魏郡皆爲故城是晉東莞縣猶在故治移此或在晉宋閒乎

後魏南青州東莞郡治莒縣及東莞縣又義塘郡治義塘縣歸義縣懷仁縣郡縣俱武定七年置初置在今江南海州界郡治黃郭

戍在海州北八十里後移州界又膠州東武郡姑幕縣

魏志莒縣有莒城按水經注泲水過莒縣東其城三重並悉崇峻唯南開一門內城方十二里郭周四十許里地理志曰莒子之國秦始皇縣之漢興以爲城陽國是莒縣卽古莒城元和志莒縣理莒國故城寰宇記同是莒縣並未徙治所有當卽指外城如縣治外城卽指內城耳而懷仁縣治州南境亦云有莒城殊所未詳或曰莒亦都渠邱或指渠邱歟備考寰宇記海州懷仁縣梁於此置黃郭戍後魏置義塘郡理黃



郭成領義塘懷仁歸義三縣並理今密州莒縣界又云郡縣俱移就高密郡莒縣界內置在古辟陽城後詳雜考州志州東

南有故郡中故郡老故郡北故郡大郡等社皆近義塘郡村名也魏志歸義有蘆山懷仁有吳山皆在今州南寰宇記歸

義故城在懷仁縣此懷仁在江南贛榆北二十五里亦在州境內

高齊南青州周莒州義塘郡莒縣天保七年廢東莞郡又懷仁縣

又東莞縣未詳所屬周因之

寰宇記齊文宣帝罷東莞郡以莒東莞二縣屬東安郡隋開皇三年廢郡考隋志莒縣舊置東莞郡後齊廢復置義塘郡按義塘郡本後魏移置莒境者並非齊始置齊廢東莞郡或

移義塘郡治莒城或仍魏舊雖未可知而莒縣屬義塘郡則

隋志有明證東莞似亦屬義塘郡或屬東武郡樂氏不知齊

東莞不在圍城故謂屬東安亦難為據

寰宇記懷仁縣隋開皇三年移理於此海州西北九十里則齊周仍

魏舊矣隋志懷仁下東魏立義塘郡及懷仁縣不及義塘歸

義當亦齊廢

隋沂州琅邪郡莒縣開皇三年廢義塘郡徙懷仁於今江南海州贛

榆縣莒縣屬莒州沂州治沂水大業三年來屬又高密州東莞縣

唐河南道高密郡莒縣武德五年以縣屬莒州貞觀八年州廢

來屬五代因之



宋京東東路高密郡莒縣

金山東東路莒州治莒縣大定二十二年於縣置城陽州二十

四年改析置日照縣

元都省山東益都路莒州治莒縣

明山東布政司青州府莒州洪武初廢莒縣其地直隸於州

國朝山東布政司沂州府莒州初因明舊雍正八年直隸布政

司十二年降散州來屬

州志 嘉慶元年修 知州許紹錦

沂水縣

周紀浮來邑 一作包來 又莒密邑 蚡泉邑 又陽國後入齊根牟

國後入魯又戰國齊蓋邑

浮來邑在西北八十里春秋隱公八年公及莒人盟於浮來

杜注紀邑東莞縣北有邳鄉邳鄉西有公來山號曰邳來閒

公穀作包來范甯以為宋邑似誤縣志浮來山隋志名松山

今名閔公山齊乘以莒州南之浮邱山當之非是 漢功臣

侯表邳離侯路博德下有朱虛字據漢志東泰山隸朱虛邳

來在東泰山南即邳離矣史表作浮離蓋浮有符音矣

密邑在縣西南春秋閔公二年莒人歸共仲及密杜注費縣

北有密如亭水經注沂水南合時密水水出時密山莒地莒

人歸共仲及密而死是也按時密山在縣西南四十里其地



非費縣北或注有誤歟俟再考

蚡泉邑在縣西南春秋昭公五年叔弓敗莒師於蚡泉縣西

南百二十里有盆泉縣志謂卽蚡泉從之公羊作濱泉穀梁作賁泉傳云狄人

謂賁泉失台蓋謂東夷語也諸城盧水又名久台水疑與此同失久字形相近傳寫或誤

孟子王使蓋大夫王驩為輔行又兄戴蓋祿萬鍾四書釋地

以為半為王朝下邑半為卿族私邑理或然也水經注時水支津經高苑

縣有蓋野溝水注之在今新城境南去於陵甚近烏知非彼處別有蓋邑乎備考 卽漢縣

春秋閔公二年齊人遷陽漢志陽都下應劭注齊人遷陽故

陽國是俞皋春秋釋義齊遷陽在今保定路唐縣按昭十年齊高偃帥師納北燕伯於梁陽左傳作唐杜注陽卽

唐別邑俞氏以地同名而臆度之耳漢東海郡有都陽縣應劭注與陽都縣下同或自此遷彼歟

根牟國故城當在東南春秋宣公九年取根牟杜注陽都縣

東有牟鄉寰宇記以安邱牟鄉城當之非是後漢志陽都有

牟臺卽根牟劉昭注引會平州事誤公羊以為邾婁邑似誤

漢徐州琅邪郡東莞縣又朱虛縣地邳來前漢隸朱虛晉隸東莞見前後漢魏未詳充

州泰山郡蓋縣城陽國東安縣陽都縣西北當有慮縣地

東莞縣故城在東北四十里今城子嶺詳下

蓋縣故城在西北百二十里今蓋邑莊寰宇記作八十里誤

東安縣故城在南三十五里今東安社

陽都縣故城在西南百二十里今魏王城後漢書注在承縣南彼或都陽縣歟

後漢徐州琅邪國東莞縣東安縣陽都縣兗州泰山郡蓋縣承平



二年以泰山之蓋益琅邪後漢末於東莞縣地置東莞郡於蓋  
又屬東海未詳何時還屬三國魏志臧霸傳太祖破呂布以尹禮為東莞  
縣地置東安郡太守時在建安三年水經注稱魏黃初中立誤  
又四年使霸入青州破齊北魏因之晉書下邳王晃傳魏世為  
海東安二郡或建安初立也魏因之東莞太守武帝受禪封下  
邳王又三國魏志國淵傳樂安蓋人宋志蓋縣下云晉太康地  
志屬樂安考蓋縣與樂安郡地不接壤而東安郡城在其縣境  
是魏至晉太康前蓋縣屬東安郡二書樂字皆東字形訛耳陳  
思王植傳注摯虞文章志劉表子季緒為東安太守是二郡皆  
終魏世所有補三國志漢末置東安郡旋省似未核

東莞郡城即今縣治舊以今治為東莞縣城以東北城子嶺  
為古鄆邑城非也水經注沂水逕東莞縣故城西與小脫一本  
字沂水合孟康曰故鄆一本訛邑今鄆亭是也魏文帝黃初  
中立為東莞郡東燕錄謂之團城魏南青州治左氏傳曰莒

魯爭鄆為日多矣今城北鄆亭是也京相璠曰琅邪姑幕縣

南杜預稱城陽姑幕四十里員亭故魯鄆邑今在團城東北

四十里猶謂之東莞故城按在團城東北四十里者既以為

鄆邑鄆邑在漢晉之世未為縣治何以稱為東莞故城耶城

子嶺在姑幕城西南七八十里與京杜說皆不符莒州之東

莞集確是鄆城則城子嶺當為東莞縣治而今治為東莞郡

城古郡國與所治縣多不同城人不察耳道元誤以團城為

縣城因誤以縣城為鄆城而兩城皆名東莞則一縣治一郡

治固甚明也近志謂縣城在今治西北愈繆

東安郡故城在西北九十許里今東安莊後魏志蓋縣有東



安城考漢東安縣在縣西南與蓋縣中隔宋魏發干縣地斷非所有縣志云西北九十里東里店東北五里沂北岸有東安莊莊西北有石橋二相傳為東安城弔橋去蓋邑莊二十餘里蓋縣所有必此城據水經注漢縣城在團城西南非此城則此城為東安郡城無疑矣

晉徐州東莞郡治東莞縣郡治郡城武帝併郡入琅邪國晉書琅邪

王佑傳初封東莞郡王後改封琅邪以東莞益之太康年復晉志徐州下稱太康元年置考佑於太康四年薨似復郡當在此時缺疑俟考朱謀璋以晉志與水經注魏置互異為未詳蓋不知郡曾併入琅邪也又蓋縣太康前屬東安琅邪國陽都縣東安縣元康元年移東莞郡治莒縣復於郡城置東安郡南燕慕容德於郡城置團城鎮

隋志沂水舊置東安郡蓋東莞郡移治復於此置東安郡也

劉宋徐州東安郡治蓋縣郡治縣之團城又發干縣

後魏南青州治東安郡治蓋縣州郡治縣之團城顯祖於郡置

東徐州太和二十二年改又發干縣高齊省蓋入新泰

宋魏東莞縣已移治莒州之東莞集東安縣又省郡無倚郭

縣當為蓋縣地元和志沂水縣後魏孝文帝於此置新泰縣

考隋志沂水下但云舊置南青州及東安郡開皇初郡廢改

縣曰東安是隋改郡為縣以郡名為縣名並無舊曰新泰之

文也後魏置之新泰一統志謂即蒙陰甚是詳蒙陰齊省蓋縣

遂為新泰地李氏因此致誤 齊乘沂水漢東莞縣南燕於



此置縣魏孝文改為新泰甚繆

發干縣故城在西北二十里今古城莊魏志發干有咆山或

作危今作雹山在縣西北二十八里一統志發干故城在縣

西北即古城莊矣蓋以晉戍為名非一城也或謂縣治亦在

琅邪郡城者其地去咆山二百四五十里且中隔即邱縣地

琅邪郡城即開陽城在臨沂城南臨沂城宋魏為即邱縣地也縣志謂發干治陽都故城皆

未確今從一統志

隋志東安下云後齊廢開皇十六年復考宋魏皆無東安縣

而隋之東安即故蓋縣是齊廢蓋縣非廢東安也

宇文周莒州治東安郡治團城為新泰縣地

隋沂州沂水縣東安縣開皇初廢東安郡置東安縣為莒州

治十六年改今名別置東安縣寰宇記隋于蓋縣故城置東安

城去縣百二十餘里記作八大業二年莒州廢二縣來屬

唐河南道沂州沂水縣武德五年於縣置莒州貞觀八年州

廢來屬五代因之

宋京東東路沂州沂水縣

金山東東路莒州沂水縣北境當有

元都省山東益都路莒州沂水縣

明山東布政司青州府莒州沂水縣

國朝山東布政司沂州府沂水縣初因明舊雍正八年屬莒州



直隸州十三年屬

縣志道光七年修古蹟慮城在西南百二十里誤詳蒙陰

蒙陰縣

周魯蒙邑齊堂阜邑艾邑南境當有 顓臾國地

春秋哀公十七年續經公會齊侯盟於蒙杜注蒙陰縣西故

蒙城是也按卽漢蒙陰縣

堂阜邑在縣西北春秋莊公九年左傳及堂阜而稅之杜注

東莞蒙陰縣西北有夷吾亭水經注桑泉水出五女山縣西南

東南流實東北流巨圍水注之水出巨圍之山在西北四十里又東南堂阜水入

焉其水導源堂阜東南注桑泉水桑泉水又東南逕蒙陰縣

故城北叟崗水注之按叟崗水入桑泉水在今治之南堂阜

水入桑泉水在此水之西而巨圍水之東今治西有東西二

諸福河西河發源西北十八里之伏牛峪東河發源北八里

方山二水入桑泉水在巨圍水近志誤以此水為堂阜水東叟崗水入桑

泉之西舍此別無可當堂阜水者堂阜當卽在其發源近地

通典堂阜在新泰縣東正其處矣惟齊乘稱堂阜水卽蒙陰

東北憚阜大小二河未詳所指何水又謂堂阜在沂水縣西

三十里磨石峴下今縣東 十里有坦阜集皆與二杜及酈

氏說不合縣志稱在西北三十里近之矣

艾邑在縣北春秋隱公六年公會齊侯盟於艾杜注太山牟



縣東南有艾山按卽縣北沂水發源之艾山寰宇記艾山在

新泰縣東北三十里蓋古人山名所賅者廣牟城在今萊蕪

東二十里其東皆古艾山也後漢志劉昭注引杜注於臨沂

下而削去太山牟三字近志多沿其誤桓十五年會艾公作鄒穀作蒿

漢兗州泰山郡蒙陰縣及牟縣地又城陽國慮縣東南當有華縣地

蒙陰縣故城在西南十五里今西城子據水經注桑泉水逕

蒙陰城又東始納叟崗水則蒙陰城在叟崗水西矣西城子

正其地土人以爲周蒙城蓋漢縣卽古邑也通典新泰下蒙

陰一本訛陽縣故城在東南卽此城

慮縣故城在東北 十里今故縣莊水經注盧川水出鹿嶺

山東南流逕城陽之慮縣故蓋縣之盧上里也王莽更名之

曰著善矣按盧川水今又名崗下水發源縣東北井王莊西

馬頭崗之老隄峪縣東北六十里中山社西有故縣莊中有漢碑

縣志未載其碑文 傍有著善河卽慮縣故城矣水經注作

盧古通用可證沂水縣志之誤蓋沂水西南亦有廬山志誤因此

後漢蓋縣地牟縣地後漢慮省入蓋蒙陰亦省東平陽又省西境當爲牟縣地華縣又省南境當爲南武

陽地魏蒙陰未詳復置否魏復置東平陽西境當有其地

晉徐州琅邪國蒙陰縣初屬東莞郡後屬又東莞郡蓋縣地充

州泰山郡東牟縣地當有新泰縣地劉宋蓋縣地牟縣地蒙陰當是晉亂廢

晉蒙陰縣故城在東南十里今公家城據杜預說晉縣在古



蒙城東也縣志相傳此城爲晉蒙陰是已杜預稱東莞蒙陰  
晉志屬琅邪 晉志蒙陰蒙山在西南考元和志蒙山在費  
縣西北八十里東蒙山在費縣西北七十五里蓋古統名東  
蒙後人分爲兩山晉城在東蒙北而蒙之東北故云山在西  
南

後魏南青州東安郡新泰縣文帝別置新泰縣於此又蓋縣地

兗州泰山郡嬴縣地魏志嬴有唐阜卽堂阜高齊省新泰入東泰山郡之

新泰齊東泰山郡廢否無周隋隋志嬴有艾山唐元和志新泰

東八十里卽今縣東北六十里長五代宋九域志新泰有沂水

平山也西北境當有萊蕪縣地今縣北境沂水發源

處也又縣東南二十許里有元豐七年碑言金因之

後魏東安郡新泰縣卽今縣治魏志東安新泰有蒙山元和

志謂卽今沂水縣考今沂水縣後魏爲蓋及發干兩縣地新

泰或及其西境隋志新泰下後齊廢蒙陰入焉考後魏無蒙

陰而新泰有蒙山是齊省新泰入新泰而所省卽蒙陰故境

史誤作蒙陰耳元復置蒙陰至今未徙治元史稱初因舊名

新泰齊省後迄金未復所因卽後魏之舊治舊名而後魏所

置新泰卽今治毫無疑義矣 齊乘蒙陰齊省不知卽新泰

也又云唐初置屬泰山郡後亦廢入新泰微論唐無復置事

且唐那有泰山郡耶

元都省山東益都路莒州蒙陰縣初置行新泰縣於此後廢入



沂水為新泰鎮後復置改名

元志蒙陰初因舊名新泰中統三年以李壇亂人民逃散省

入沂水皇慶三年復置為蒙陰縣齊乘云國朝至元二年廢

行新泰縣當是元初置延祐三年析沂水之新泰今本訛作寨鎮置此

縣按紀年與史互異未詳孰是

明山東布政司青州府蒙陰縣初隨莒州屬府洪武二年逕屬

國朝山東布政司沂州府蒙陰縣初因明舊雍正八年屬莒州

直隸州十三年屬

縣志康熙二十二年修沿革西南八九里龜山下有古顛

與城按此本齊乘然在漏澤湖東北十餘里去蒙陰詎止

八九里當有訛字 東漢廢蒙陰置東莞縣北魏併蒙陰

入新泰齊復置蒙陰皆繆甚

日照縣

周莒紀障邑或曰本紀國地

紀障在南九十里今安東故衛城春秋昭公十九年齊伐莒

莒子奔紀障杜注莒邑東海贛榆縣東北有紀城寰宇記海

州懷仁縣東北七十五里平地近海周一里餘今安東城正

其地因學紀聞呂氏春秋舜葬於紀蒼梧山在海州界近莒之紀城即此城蒼梧山即鬱洲今屬海州

博物記太公望出於東呂鄉又釣於棘津其浦猶存後漢志

引此於西海縣下但未詳其時屬何國



漢徐州琅邪郡海曲縣昆山縣及贛榆縣地

琅邪海曲縣故城在西十里或據水經注以諸城之婁城為  
琅邪海曲考後漢書劉盆子傳天鳳元年琅邪海曲有呂母  
者子為縣吏宰殺之呂母聚少年數千殺宰元和志莒縣下  
今東海縣有呂母固即舊集之所按東海縣在今海州東古  
鬱洲上與縣隔少海相望又漢志琅邪海曲有鹽官元和志  
漢海曲縣在莒縣東一百六十里是琅邪海曲即此城無疑  
紀要日照漢海曲縣置鹽官名曰日照按漢時無日照名  
昆山縣故城在西北百 里諸城縣志稱在昆山西七里  
後漢徐州琅邪國西海縣即海曲改東海郡贛榆縣地魏西海省否

未詳晉劉宋莒縣地東海郡贛榆縣地後魏東海郡屬海州高齊東海郡改北

郡因之宇文周莒縣地海州東海郡東海縣地隋唐五代莒縣

地東海郡懷仁縣地宋海州屬淮東路因之元祐二年於莒縣置日照

鎮漢贛榆城在唐懷仁縣東北三十一里一名鹽倉城唐懷仁縣城在今贛榆縣西里隋自莒縣移此今贛榆縣紀要

以為唐初置南唐移懷仁縣於此東北至日照縣一百六十里

金山東東路莒州日照縣析莒縣於日照鎮置懷仁改贛榆疑分兩縣置新縣

日照縣即今治

元都省山東益都路莒州日照縣

明山東布政司青州府莒州日照縣附宏治三年置安東衛初領



五千戶所後領嘉靖中置石臼寨千戶所  
中前後三所

縣志明初用二千戶鎮守洪武二年革去鎮守官仍置縣令

若然是初裁縣令矣明史不載備考

安東衛故城見前石臼所故城在東南二十里

國朝山東布政司沂州府日照縣初因明舊雍正八年屬莒州

直隸州十三年屬

縣志康熙五十四年修古蹟沙浦古郡名在城東南二十  
知縣楊士雄

里見郡志按青州舊志博興古蹟有沙浦郡實海浦之訛

牽入日照尤不可解石河縣相傳在海中按古亦無此

縣考唐初析東海置石城縣後省寰宇記西捍海塘北抵

石城山長六十里蓋石城山在東海縣北六七十里石城

縣當在其地隔海北與日照遙對或由此傳訛耳



沂州府補遺

蘭山縣

晉書顏含傳補闔陽令卽開陽晉志開陽下注侯相含作令當  
永嘉時侯國蓋亂廢矣

唐書王仲邱傳沂州琅邪人按唐沂州無琅邪縣仲邱自是琅  
邪王氏當作沂州臨沂人

郯城縣

春秋桓十二年冬公會宋公於虛公羊作會於郯

元史世祖紀至元元年城郯以沂州監戰塔思萬戶孟義所部  
兵戍之縣志以爲元末築土城蓋重修也郯終元史未立縣元



初與宋爲鄰故城之而成以兵宋滅當卽空廢元末江南兵起故復修而守之

費縣

呂氏春秋夏孔甲田於東陽負山帝王世紀謂卽東首陽山可證劉昭之誤 路史太王復娶於駘卽縣南台亭不可從 又以顓臾爲漢縣尤繆

晉書孝友傳顏含琅邪莘人莘華字之訛

莒州

後漢書方術傳趙彥爲宗資陳孤虛之法以爲賊屯在莒莒有五陽之地章懷注謂城陽南武陽開陽陽都安陽並近莒按南

武陽旣非莒地又非前漢城陽國屬安得謂莒所有乎近莒一帶並無安陽地名開陽差近莒乃古邾國前漢亦不屬城陽余謂五陽惟城陽高陽確在莒境陽都雖古陽國前漢實屬城陽可當其一卽謂開陽近莒亦當其一仍不足五數也

晉書載記慕容德進據琅邪寇莒城齊郡太守辟閭渾自廣固奔魏德遣劉綱追斬於莒城按魏時都代自廣固奔魏無南至莒城之理況德方駐莒城渾尤無反來就死之理劉綱曰遣日追非此莒城明矣零縣亦有莒城廣固之代所必經當在彼也路史莒國隨之莒州今密州莒縣理厥後移理鹽官城故世謂南莒按旣謂今莒縣理是宋時莒縣並未移理矣金人分莒置



日照日照乃漢海曲縣古有鹽官鹽官城當在彼羅氏在江南誤以分置縣爲移治耳魏志懷仁縣有莒城余初疑之觀此或鹽官城早有南莒之稱懷仁所有指彼也備考

蒙陰縣

路史蒙國東莞蒙陰有小蒙城按蒙陰無小蒙城蒙陰古顛與國非蒙國

日照縣

太公出於東呂鄉路史謂卽莒國考莒初都計斤商時此地未必已爲莒國地



